

Q. D. B. V.

DISSERTATIO JURIDICA

De

FUNDAMENTORUM
DEFINIENDI CAUSAS MATRI-
MONIALES HACTENUS RECEPTO-
RUM INSUFFICIENTIA.

QUAM

RECTORE MAGNIFICENTISSIMO

SERENISSIMO PRINCIPE ac DOMINO,
DN. FRIDERICO WILHELMO,

Electoatus Brandenburgici Herede
&c. &c. &c.

P R Æ S I D E

DN. D. CHRISTIANO THOMASIO,
Consil. Elect. Brandenb. & Prof. Publ.

Publico Eruditorum Examini submittit

Die 14. Maj. Ann. M DC XCVIII.

H. L. Q. C.

BERNHARDUS FRIDERICUS Buhle /
Harzger-Anhalt.

HALÆ MAGDEBURGICÆ,
LITERIS CHRISTOPHORI SALFELDII,
TYPOGR. ELECT. BRAND.



DISSERTATIO JURIDICA,
De
**FUNDAMENTORUM
DEFINIENDI CAUSAS MA-
TRIMONIALES HACTENUS
RECEPTORUM INSUF-
FICIENTIA,
SUMMARI A.**

Communiter sudamus in inutilibus, negligimus aut obiter tra-
ctamus utilia §. 1. Quod & factum utilissima materia de nu-
ptiis §. 2. Utpote quæ misere proponitur à Scriptoribus Pon-
tificiis §. 3. Neque sufficienter ex Reformatis à Voëtio & Beza
§. 4. Neque multò melius à Lutheranis. §. 5. Dolendum in-
super, quod in tractatione harum questionum sæpè immisceantur ca-
lumnia & intempestivæ criminum imputationes §. 6. Hic verò veritatis
studiosus ante omnia origines errorum notat. §. 7. Multum confusam
nostratium tractationem promovit incauta defensio conclusionum qua-
rundam ex hypothese, quod Matrimonium sit Sacramentum, per Refor-
mationem rejecta, profluentium. §. 7. Fons autem errorum hic est, quod
scriptores causarum matrimonialium destituantur fundamento. §. 9. Nam
quod jus naturæ attinet, hypothesis Scholastica de jure naturæ ad causas
matrimoniales est insufficiens, §. 10. 11. 12. ut ex qua ne quidem absurda
Lyseri sententia, polygamiam virilem jure naturæ esse præceptam vo-
lentis, potuit refutari. §. 13. 14. Aque insufficiens est hypothesis de con-
venientia cum statu integritatis, §. 15. 16. præprimis cum non sine ratio-
ne dubitetur, an in statu integritatis futurum fuisset matrimonium. §. 17.
Novior hypothesis: Periculosum esse querere jus naturæ in dictatu rationis,
item asserere, id esse cordibus hominum insitum §. 18. Fundamentum
juris naturæ esse convenientiam cum ordine & fine creaturarum, (Pacta
& contractus non esse juris naturæ.) §. 19. Post lapsum tamen istum ordi-
nem creaturarum difficillimè & nonnisi per umbram cognosci. Inservire
tamen ejusdem cognitioni octo gradus amoris Scholasticorum §. 20. Pri-
mum gradum esse amorem Dei, cujus tamen colendi modum non præscri-
bat jus naturæ. §. 21. Secundum gradum esse amorem animæ nostræ. Sum-
mum bonum morale hominis esse edere, bibere & gaudere. §. 22. Tertium

gradum esse amorem animæ proximi. Homines etiam in statu primævo
citra curam aliorum fuisse animalia miserrima §. 23. Quartum gradum
esse amorem universi §. 24. Quintum, vitæ nostræ §. 25. Sextum, vitæ
proximi §. 26. Septimum bonorum nostrorum, (Dominium esse juris na-
turæ) §. 27. Octavum, bonorum proximi §. 28. His addendum esse no-
vum gradum amoris cujusvis creaturæ. Cognitionem tamen ordinis
singularum creaturarum in Adamo esse amissam §. 29. Inde sequi, quod
homo etiam in bestias possit delinquere. §. 30. Expenditur veritas dictæ
hypotheseos §. 31. Et ostenditur: non esse periculosum, quærere jus naturæ
in dictatu rectæ rationis §. 32. nec esse periculosum, si asseramus, jus na-
turæ inscriptum esse cordibus hominum §. 33. Sententiam de fundamen-
to juris naturæ in convenientia cum ordine Et fine creaturarum 1) non esse
veram, quatenus docet, jus naturæ etiam in creaturas ratione carentes ca-
dere §. 34. Ex impetu agere, Et secundum legem agere, esse opposita §. 35.
36. 37. 38. 39. 40. 2) Non esse adequatam, cum non omnis ordo naturæ
sit jus naturæ; §. 41. Nec omne quod est adversus ordinem naturæ etiam
humane, sit contra jus naturæ §. 42. 3) Non esse evidentem, cum ignore-
mus, quot sint partes hominis, quid sit corpus, quid anima hominis, quid
pertineat ad bonum hominis §. 43. nec detur evidens distinctio ordinis
naturæ ab ordine humano §. 44. Non videri convenienter pacta Et con-
tractus à jure naturæ eximi Et Juri gentium tribui. §. 45. Ipsos dissentien-
tes fateri, hypothesin illam esse obscuram §. 46. Neg, videri ex amore
hominis convenienter deduci jus naturæ omnibus creaturis commune
§. 47. 48. aut minimum istam hypothesin coincidere cum hypothesi
de socialitate hominis §. 49. Primum amoris gradum non pertinere ad jus
naturæ §. 50. Jus naturæ contra propriam hypothesin à dissentientibus
peti ex dictatu rationis §. 51. Obscurè dici, quod ex jure naturæ obligemur,
ut omni creatura utamur ad gloriam Dei §. 52. 53. 54. 55. 56. 57. In se-
cundo gradu obscurum esse, an vita commoda differat ab ea, quæ sedatos
affectus habet §. 58. Item in hoc gradu lectorem duci in circulum §. 59.
Et disputari adversus propriam hypothesin §. 60. Doctrinam verò de
Summo Bono in vita secundum naturam Et carentia doloris consistente
debere sano sensu explicari §. 61. Salomonem denig, hic non optimè cum
Epicuro jungi. Alium longè sensum esse dicti Salomonis à dicto Sardanapali.
62. In tertio gradu curam animæ proximi non restringendam esse ad curam
Intellectus. §. 63. Neg, verum esse, quod homo integer miserū fuisset Et clin-
gve animal absque aliorum curâ; §. 64. Neg, id probari ex eo, quod Chri-
stus profecerit in spiritu Et sapientia. §. 65. Monita circa gradum quar-
tum,

tum, §. 66. & quintum, §. 67. item sextum, §. 68. & septimum, §. 69. Dominum non esse ex jure natura immediate: si verò sit, etiam pacta esse ex jure natura, §. 70. Monita circa gradum octavum §. 71. & nonum §. 72. Nova confessio de obscuritate istius hypotheseos, item de summa perfectione cognitionis in Adamo citra curam aliorum hominum §. 73. 74. 75. 76. Ex ista hypothesis etiam impugnari ea, de quorum tamen licentia nullum est dubium: v. g. non licere vinum bibere, navigare, lapidem sursum projicere &c. §. 77. Neg³. ex ista hypothesis in causis matrimonialibus quasdam assertiones firmari v. g. quod qui meretricem ducat, faciat opus pietatis §. 78. item quod incestus in linea recta sit prohibitus ob ordinem naturæ & reverentiam parentibus debitam, §. 79. item: Senem enervatum cum puella non posse inire matrimonium, & hinc cum tali non committi adulterium. §. 80. item: quod thesis vera quidem, matrimonium esse juris naturæ, non possit tamen connecti cum propria hypothesis. §. 81. item: non posse demonstrari assertionem: non nudum consensum facere matrimonium, sed insuper ad ejus essentiam requiri traditionem, §. 82. & quæ inde deducitur, conclusionem: In concursu duorum sponsaliorum de presenti præferenda posteriora, si benedictio sacerdotalis accesserit. §. 83. In definiendis causis matrimonialibus necesse est præter Jus Naturæ, etiam respicere ad Jus Divinum positivum universale, §. 84. frustra dissentiente B. Brucknero. §. 85. Neque defectus hujus Juris suppleri potest per pudorem quendam naturalem ex l. 14. §. 2. ff. de R. N. §. 86. Lamberti Velthuysii opinio de distincta pudoris in causis matrimonialibus consideratione. Res ex ejus mente Jure Naturali præceptæ, prohibitæ, & indifferentes. §. 87. Velthuysium jam suo tempore fundamentum Juris Naturæ posuisse in ordine creaturarum, differre tamen ejus doctrinam ab hypothesis superius excussa. §. 88. Velthuysio ordinem naturæ consistere in conservatione sui, & hanc conservationem esse ipsi primum principium Juris Naturæ. §. 89. Differentia doctrinæ Velthuysii à doctrina Hobbesii. §. 90. Rejicitur ratio, quæ Velthuys. probare vult, conservationem sui esse principium Juris Naturæ. §. 91. 92. Duplicia secundum Velthuysium peccata contra seipsum, alia contra naturam strictè dicta, alia contra decorem & dignitatem hominis. §. 93. Ostenditur Velthuysium inconvenienter permittere senibus appetitum copulæ, §. 94. & ex ejus ratione fornicationis licentiam etiam adversus ipsum defendi posse. §. 95. Polygamia, divortium, incestus, pudendorum revelatio secundum Velthuysium non sunt peccata contra Jus Naturæ, sed repugnant pudori & honestati naturali. §. 96. Ergo Velthuysius in causis matrimonialibus præter conservationem sui aliud fundamentum, nempe pudorem, agnoscit. §. 97. Contra decorem & dignitatem hominis peccare dicit Velthuysius vitium ebrietatis & indecoras gesticulatio-

lationes. §. 98. Ostenditur, Velthuysium maximè esse obscurum in eo puncto, quomodo differant peccata contra pudorem & contra dignitatem hominis, §. 99. 100. & in assignandis speciebus horum duorum generum mire fluctuare. §. 101. Obscuritatem non tolli per id, quod Velthuysius asserat, peccata contra dignitatem etiam repugnare homini integro, contra pudorem verò saltem lapsi. §. 102. Neque tolli hanc obscuritatem ex Velth. Tract. de Naturali pudore. §. 203. Etsi enim ibi tres gradus pudoris faciat, quando scil. quid committatur vel contra legem, vel contra pudorem strictè dictum, vel contra dignitatem, §. 104. non tamen ponuntur certa axiomata hos gradus secernendi, §. 105. sed postulata saltem quadam aequè obscura aut etiam falsa. §. 106. Postulatum I. Hominem integrum habuisse corpus terrestre & animale. §. 107. Ostenditur falsitas huius sententia, & quomodo ex principiis vera Logica ac Physica sint exponenda loca, Gen. II. v. 7. & 1. Corinth. XV. 45. ita ut in hoc ultimo loco per secundum Adamum intelligatur Adamus integer. §. 108. 109. 110. 111. 112. Confirmatur firmissimis argumentis hac expositio, & quod Adamus integer non habuerit corpus terrestre & animale. §. 113. 114. 115. 116. 117. Postulatum II. In corpore Adami integri fuisse membra vilia & minus honesta. §. 118. Ostenditur etiam huius postulati falsitas, §. 119. 120. & quod non probetur ex 1. Cor. XII. v. 23. §. 121. 122. Postulatum III. Talia membra esse, quæ ad functiones edendi, bibendi ac coeundi destinata sunt, §. 123. item quæ inserviunt excernendis excrementis §. 124. In talibus ergo membris esse triplicem turpitudinis gradum. §. 125. 126. Ostenditur, doctrinam huius Postulati planè non coherere. §. 127. 128. 129. 130. Postulatum IV. Adamum de vilibus istis functionibus in statu integritatis non erubuisse, quia non habuerit scientiam boni & mali. §. 131. Observatio circa hoc postulatum. §. 132. Eadem observatio circa Postulatum V. Per lapsum Adamum cum damno suo scientiam boni & mali acquisivisse. §. 133. Postulatum VI. Post lapsum ergo in Adamo ob ista membra pudorem fuisse ortum, partim quod senserit, inde oriri in animis aliorum hominum aestimationis suæ imminutionem, partim in Eva contemptum sui. §. 134. Ostenditur Adamum ob amissam gloriam & membrorum utilitatem causam pudendi nullam habuisse, nec intuitu Eva, nec intuitu posterorum. §. 135. Postulatum VII. Pudoris in Adamo causam non esse considerationem libidinis in coitu, quia hæc nec abfuit in statu integritatis, §. 136. quod & ipsum negatur. §. 137. Igitur ex Velthuysii principiis nihil solidi sperandum est in definiendis causis matrimonialibus. §. 138. Ut qui post varios discursus insufficientiam principiorum suorum ipse fatetur. §. 139. Sola allegatio pudoris naturalis in causis matrimonialibus est tacita confessio ignorantia, §. 140. præprimis in Jcio Christiano. In causis matrimonialibus pudor deducendus ex lege. §. 141. Fundamenta definiendi causas matrimoniales etiam in Institutionibus Juris Divini tradita sunt insufficientia, §. 142. non tamen falsa. §. 143. Indicatur insufficientia doctrina circa Jus Naturæ, §. 144. & summa emendationis, §. 145. atque usus in causis matrimonialibus. §. 146. Insufficientia doctrinarum circa Jus Divin. positivum universale. §. 147. Emendatio earundem summaria. §. 148. Plenior reservatur discursui peculiari de fundamentis genuinis causarum matrimonialium, §. 149. & excursio fundamentorum aliorum communiter immisceri solitorum discursui de fundamentis spuris causarum matrimon. 150.



§ 1.



Infœra est conditio Jurisprudentiæ nostræ. Sudamus in multis rebus, quæ nullum usum habent aut exiguum; negligimus plures adhuc res, aut superficiariè eas tractamus, quæ usus quotidiani sunt. Sudamus v. g. in difficillimâ doctrinâ Juris Romani de jurisdictione, pactis, contractibus innominatis, actionibus bonæ fidei & stricti juris, actionibus arbitrariis, item pœnalibus, doctrinâ culparum, fructuum, impensarum & infinitarum aliarum rerum, quæ tamen hodiè vel nullum habent usum, ut priora recensita capita, vel certè quæstiones subtiles & intricatæ in ultimis materiis culparum, fructuum, impensarum, aut rarò occurrunt in praxi, aut difficillimè applicari possunt. Quæ quotidie obveniunt; ut quæstiones de rusticis, hominibus propriis, de juribus venationum & forestalibus, de causis mercatoriis & cambialibus, de causis opificiorum, & opificum &c. horum doctrina ferè omittitur in Academiis, & demum in ipsâ praxi multis cum incommodis addiscenda est. Unde diligentia Jcti Jennis Adriani Beyeri, Jurisprudentiam opificiariam hætenus eruditis dissertationibus illustrantis meritò alios ad similia in aliis capitibus tentanda deberet instigare.

§. 2. Et quid magis frequentatur, quàm *Matrimonium*? Quid majoribus controversiis involutum est, quàm Matrimonium? Sponsione quâvis absque periculò certare possis, nullam propè thesin in doctrinâ de matrimoniò esse, quæ non habeat opinionem communem contra communem, imò nullum ferè Scriptorem esse ex Pontificiis, Lutheranis, Reformatis, cujus doctrina in matrimoniò cohæreat exactè. At verò hoc ipsum

A

indicio

indicio est, doctrinam de causis matrimonialibus hætenus superfunctoriè fuisse tractatam, non satis eruditè. Quid enim? An eruditum dici potest, atque solidè tractatum, quod non coheret.

§. 3. Atque ne gratis istud asseruisse videamur, evolve modo ex Pontificiis, quotquot velis Scriptores de Justitiâ & Jure seu Moralistas, evolve Canonistas, evolve denique, qui omnium fusissimè peculiari opere quæstiones matrimoniales explicuit, Thomam Sanchez, nihil deprehendes nisi farraginem, sententiarum, non dupliciter, sed multipliciter sibi oppositarum & à se dissentientium, quarum sæpe nulli dicere possis: Tu mihi sola places.

§. 4. Ex Reformatis, quæ Gisbertus Voëtius *Part. I. Polit. Ecclesiast. Lib. 3. Tract. 1.* de Matrimoniô collegit, pro more Autoris non nisi scopæ dissolutæ sunt, dum videlicet statim *init. Cap. I.* præsupponit, quæ de jure connubiorum, deque ejus essentiâ, proprietatibus & officiis conjugum à Philosophis, Juris, Theologis fusè explicari solent. Ista verò præsupposita sunt infinitis modis sibi contradicentia. Extant quidem jam Theodori Bezæ eruditi Tractatus duo; unus de *Repudiis & divortiiis*, in quô præque de causis matrimonialibus incidentes controversiæ ex verbo DEI deciduntur; alter de *Polygamiâ*, in quô & Ochini Apostata pro Polygamiâ & Montanistarum ac aliorum adversus repetitas nuptias argumenta refutantur, utrobique verò *Jus Civ. Rom. & veteres Canones ad normam Juris Divini examinantur*. In quibus Autor laudandus, quod jam suô tempore tentaverit causas matrimoniales ad verbum DEI excutere, easque à fermentô ineptiisque Juris Canonici purgare. Sed uti tamen hic fortè primus inter suos glaciem fregit; ita multa prætervidit ex superstitione Papæ ortum ducentia, & pro talibus habuit, quæ ex Ecclesiâ Apostolicâ deduci mererentur. e. g. Benedictionem Sacerdotalem, statim ab initio Tractatus de Repudiis. Confer. Lambert. Velthuys. in præfat. ad *Libellum de naturali pudore*. Ut taceam, quod fervor nimius in dissentientes (utpote quô, cum Calvinô maximoperè laborabat Beza, cum contra Zwinglius mitior esset) eum sæpè obcæcaverat,

rat, ut veritatem videre ac discernere non posset, aut ut bonam causam non ita benè defenderet, uti potissimum in Tract. de Polygamia factum. Nam si unquam decet virum sapientem, in inquisitione veritatis ab affectu iræ aut favoris esse liberum, hic maximè eâ re opus est, in materiâ videlicet intricatissimâ.

§. 5. Vidit & jam suô tempore B. Lutherus multa, quæ in doctrinâ de conjugio Papismum redolent. Sed nec ipse tamen hîc ubique vidit, quantum videre opus est. Quantum fluctuaverint Theologi Lutherani in his causis jam ejus tempore, vel ex *Sarcerii Corpore juris matrimonialis* videri potest. Nostri temporibus dissensus Theologorum & JCtorum inter se & major & virulentior est. Vide *Consilia Theologica plurima in Voluminibus Consiliorum Witteberg. & Dedckenii*. Cui non notæ sunt controversiæ ætate nostrâ acriter ventilatæ? De Conjugiô cum uxoris sorore Bucholzii, Strauchii, Havemannii, & quæ collecta sunt responsa in causa Oettingensi; de Polygamia Lyseri sub variô nomine prodeuntis, Feltmanni, Diecmanni, Brunsmanni, Musæi, Daphnæi Arcuarii, Christiani Vigilii, Siricii, Slüteri, Meyeri, &c. De conjugio Evnuchi responsa collecta ab Hieronymo Delphinô &c. Et evolve solum Hieronymi Bruckneri *Decisiones matrimoniales*, deprehendes, nullam sententiam in quæstionibus matrimonialibus esse tam falsam, aut certè paradoxam, quæ non à Consistoriis Evangelicis aut Facultatibus Theologicis pariter & Juridicis approbationem invenerit.

§. 6. Dolendum verò quàm maximè, quod in dissensu hodiernô nostratium non tantum iræ sed & cavillationum ac calumniarum signa subinde occurrant. Neque enim disputantes hic contenti sunt, ostendere dissentientium opiniones veritati parum convenire, sed & mutuò se impietatis, læsi pudoris, & tantum non quandoque blasphemiæ accusant, quod in controversiis de Polygamiâ, & conjugio cum uxoris sorore accidit, Cum tamen vel maximè in tantô dissentientium, utrobique auctoritate & doctrinâ pollentium numerô, se invicem amicè & fraternè absque rancore admonere & docere deberent. Ita v. g. cum tot variantes de causis divortiorum sint gentium Christianarum

leges, rectè ait Brucknerus *Decis. Matrim. Cap. 16. n. 17. arrogans nimis fore, si quis eas leges impietatis accusare vellet. Et in addit. d.c. 16. p. 21. lit. dd. ubi ad iudicium Melchioris Klingii de Sacerdotii librò notas quasdam adjecit; pessimum hoc, ait, & publico interesse summè damnosum vitium esse quorundam, qui potestate & autoritate publicâ pollent, quò omnia, quæ alii non ad gustum aut secundum opinionem ipsorum dicunt aut scribunt, statim Incestus, adulterii, & aliorum scelerum impurissimorum nominibus traducunt & infamant, quasi scil. ipsi dictatoriâ potestate in Republ. literariâ polleant, & nil nisi, quod ipsis probatur, rectum aut justum dicendum sit, de quâ tyrannide ingenia libera aliquando DEUS severam rationem ab iis exiget: Simili modò in simili casu respondit Facultas Juridica Halensis versus R. ad consultationem Dn. L. D. S.*

§. 7. Quid igitur faciendum ei, qui in deviis hisce viam, quærit? Videtur id commodissimum esse, ut initiò orrignes errorum paucis notentur. Tùm erroribus evitatis facilè via veritatis se cuilibet conspiciendam monstrabit. Et istud quidem jam expediemus, posterius alii tempori, si DEUS voluerit, reservantes.

§. 8. Non negandum, causam & dissensionum & errorum variorum in eo esse positam, quod nostrates sublatò per Reformationem erroneò Pontificiorum assertò; quod *Matrimonium sit Sacramentum*, nihilominus multas conclusiones, quas Scriptores Pontificii ex illâ hypothesi deducunt, incauti retinuerint, easque postea malè coherentibus rationibus defendere allaboraverint, aut easdem autoritate Virorum Celebrium, Consistoriorum, Theologicarum & Juridicarum Facultatum confirmare studuerint. Exempla huc pertinentia subinde annotavit Illustris Dn. Strykius *partim in Notis ad Brunnemanni Jus Ecclesiast. partim in variis Disputat. ad causas matrimoniales pertinentibus, passim.* Sed tamen iste error nondum est ultima scaturigo turbulentæ hujus confusionis.

§. 9. Ubi nullum fundamentum est, ibi nihil superstrui potest. Ex quâ lege causæ matrimoniales dirimendæ sunt? An ex divinâ an ex humanâ? an ex utraque? Hic radix mali. Hòc intuitu

causas matrimoniales insufficientiâ.

intuitu enim apud scriptores vel nullum planè fundamentum invenies, cui assertiones suas superædificent, adeoq; sic quasi in aère libero castella struunt; vel certè ædificium fundant super arenam, cui nihil solidi superimponere possis. Id quod potissimum in novissimo scriptore B. Brucknerô dolendum, quod in dissertatione procemiali decisionum suarum matrimonialium fundamenta debitò modò non stabiliverit.

§. 10. Equidem nemo negat, jus naturæ æquè hujus ac aliarum societatum fundamentum esse debere. Interim tamen quilibet jus quoddam naturæ sibi format secundum dispositionem cerebri, vel accuratius loquendo, secundum inclinationem cordis sui. Et notissimum est, quod inter omnia capita controversa plurimæ controversiæ sint inter Theologos pariter ac Politicos de requisitis matrimonii ex regulis juris naturalis, & quod confusissimæ doctrinæ ac pesimè cohærentes fuerint inculcatæ, quamdiu Jus Naturæ ad normam Papistico-Scholasticarum hypothesium fuit expositum.

§. 11. Loquuntur id variorum commentarii ad Hug. Grot. *de Jure B. & P. L. 2. C. 5. §. seqq.* ubi videre licet, quàm anxie plerique commentatores hypotheses illas adversus Grotium, quædam veritatis studiò in doctrinâ de Matrimonio innovare vel potius renovare studentem, defendere allaborent. Quod si tamen præjudiciò auctoritatis sis liberatus, statim apparebit, defensiones illas, si iis demas arrogantiam hæretificationis, qua dissidentes i. e. cum Grotiò sentientes pro heterodoxis declarant, & sputa Scholasticorum tantùm non lingunt, omni pondere destitui.

§. 12. Scilicet uti tota doctrina de fundamentali propositione juris naturæ, de lege quâdam æternâ, de Sanctitate Dei divinæ voluntati oppositâ, de actibus quibusdam per se & antecedenter ad voluntatem divinam honestis vel turpibus &c. est obscura, inadæquata & falsa, uti ostendit Dn. Præses *L. 1. Jurisprud. div. C. 1. §. 31. it. C. 2. §. 74. seqq. & Cap. 4. §. 20. seqq.* ita in difficillimâ causarum matrimonialium materiâ inde nihil nisi obscurum, inadæquatum vel falsum sperare possumus.

§. 13. Quamdiu hypotheses falsæ communi auctoritate nituntur, ac metu heterodoxias incussô unanimiter defenduntur, tamdiu videntur incautis aut superstitiosis esse irrefutabiles ac infallibiles. Quam primum verò ista inanis autoritas contemnitur, aut metus hæretificationis constanti animô sequestratur, tùm statim vilitas ejusmodi infallibilitatum transparet, & quemlibet veritatis cupidum pudet, quod tamdiu se ut bestiam circumduci passus fuerit. Præprimis si videat ejusmodi hypotheses ita esse comparatas, ut ne quidem absurdas sententias solidè refutare queant.

§. 14. Quid absurdius excogitari potest, quàm asserere velle, polygamiam virilem non solum jure divinô esse licitam, sed & præceptam, ita ut maledictus sit, qui hoc opus Domini negligenter faciat? Et tamen cùm ita insanire inciperet sub nomine Theophili Alethæi & Sinceri Wahrenbergii Lyserus, ejus adversarii verò ex nugis illis Scholasticorum ipsum aggredierentur, refutatione hâc suâ nihil aliud effecerunt, quàm ut malam istam & ineptam causam promoverent, ac Lysero occasionem darent sub nomine Athanasii Vincentii *Polygamiam triumphaticam* scribendi, & non sine causâ de ipsis ipsorumque rationibus triumphandi.

§. 15. Tentârunt equidem, ista sentientes viri eruditi, ut Scholasticam Philosophiam hâc parte emendarent. Sed uti facilius est incautis errorem cognoscere, quàm veritatem, ita & istis emendatoribus accidit. Quid de doctrinâ, secundum quam jus naturæ ad hypothesin statûs integritatis exigendum sit, sentiendum, fusius dixit Dn. Præf. in Instit. Jurispr. div. L. 1. C. 4. §. 40. seqq. & in scholiis adjectis vid. etiam programma German. nov. Edit. præmissum.

§. 16. Et vel ideò ad causas matrimoniales definiendas illa hypothesis parùm apta est, quia supponit multos errores communes pro veris, quod in statu integritatis obtinuissent. v. g. imperium maritale, item imperium parentum in liberos, ut adeò & in statu integritatis consensu parentum ad nuptias filiorum fuerit opus, cum tamen utroque se in statu integritatis

tis rem aliter habuisse ostensum etiam fuerit in *Jurispr. div. L. 1. C. 2. §. 29. & Lib. 3. C. 2. §. 105. sq.*

§. 17. Ut taceam, istud nondum constare, an in statu integritatis societas nuptialis planè fuerit; cum secundum quorundam opinionem, ut nobis videtur vero haud absimilem, duplex statuatur Adami lapsus; unus ante creatam Evam in desiderio consistens more bestiarum se multiplicandi, *Gen. 2. v. 18. 21.* cum antea solus Adam potentiam habuerit spirituali modò in se ipsò & ex se ipsò se multiplicandi *Gen. 1. v. 27. 28.* alter post creatam Evam per comestionem ab arbore vetitâ commissus *Gen. 3. v. 1. seqq.* Quem duplicem lapsum Origenes eumque secuti alii confundentes ac miscentes statuerunt, comestionem ab arbore vetitâ mysticè denotare congressum carnalem cum Eva. Sed de hóc fortè alibi.

§. 18. Alii docent, Jus Naturæ nequaquam in dictamine rectæ rationis, sed in ordine naturæ consistere. *Periculosum*, esse in dictatu rationis querere jus naturæ; sic enim, quot capita tot sensus, & non nisi ex hoc fonte profluere diversissimas illas & monstruosas de jure naturæ opiniones, dum hoc vel illud dictare Jus Naturæ, alter affirmet, alter neget, unde & periculosum & absurdum esse, statuere, quod in hoc consistat forma, sive modus promulgandi legem naturalem, quod sit omnium mortalium cordibus insitum.

§. 19. Totum enim juris Naturalis studium consistere in cognitione creaturarum, quò sciamus, in quo ordine quæque res creata sit, eâdemque in illo ordine, ad eum finem, ad quem creata est, utamur. Hinc non confundendas esse virtutes Juris Naturæ, Temperantiam, nempe & Veritatem cum virtutibus Juris Gentium & Juris Civilis, quales sint: Fortitudo, Magnanimitas, justitia distributiva, & magnam partem commutativa, & quæ dici possit rectè unica virtus Theologica, Moralis & Civilis, la Complaissance. Inde Pacta & Contractus non esse Juris Naturæ sed Gentium.

§. 20. Quâ verò ratione circa actiones istas naturales rectè sese gerere debeat homo, id admodum difficile esse exprimere, cum lapsu primorum parentum natura humana ita depravata sit; ut usum ac ordinem omnium creaturarum nonnisi quasi per umbram aliquatenus cognoscere possit.

„ cognoscere , nedum observare possimus. Ad illum tamen quodam-
 „ modò investigandum commodissimè humanas actiones examinari posse
 „ secundum gradus amoris , ut qui unicum sit naturæ vinculum , idem-
 „ que unicus hominis affectus , & in cujus rectâ gubernatione omnis vir-
 „ tus & verum honestum consistat. Amoris autem octo gradus vulgò
 „ à Scholasticis solere enumerari.

„ §. 21. Primum gradum esse Amorem DEI, per quem oblige-
 „ mur ad ejus cultum. Certum autem numen colendi modum non
 „ præscribere jus Naturæ , at hunc ab ipsius DEI revelatione vel etiam
 „ certâ ratione à Majestatis Civilis dispositione dependere , ita tamen , ut
 „ errantes mitius tractentur. Secundum hunc amoris gradum , quan-
 „ tum Jus Naturæ attinet, omnem creaturam tam in nobis, quam extra
 „ nos adhibendam esse primariò ad gloriam DEI,

„ §. 22. Secundum gradum esse amorem animæ nostræ ad com-
 „ modè transigendam vitam & affectus corporis secundum rectam ratio-
 „ nem dirigendos. Si enim ita animus secundum ordinem naturæ &
 „ rectam rationem dirigat affectus , consequi hominem summum bo-
 „ num morale i. e. constantem voluptatem animi , quæ secundum Epi-
 „ curum rectè consistat in vitâ secundum naturam , & carentiâ doloris,
 „ & quæ etiam Sapientissimi Salomonis sit sententia , plus simplici vice
 „ docentis : Hominem nihil melius (ergò hoc esse optimum) habere sub
 „ sole , quàm edere , bibere (scil. secundum naturam) & gaudere Ec-
 „ cles. C. 8. v. 15. C. 5. v. 17.

„ §. 23. Tertium gradum esse amorem animæ proximi. Hanc
 „ ab initio esse instar tabulæ rasæ , in quâ nihil sit scriptum , & adeò
 „ homine nullum miserius animal fore , si citra aliorum curam ad robu-
 „ ram provectus foret ætatem , elingve nimirum ac nudum & ad omnem
 „ societatem ineptum. Et ejusmodi conditioni homines , etiamsi in statu
 „ primævò permansissent , obnoxios fuisse , non ineptè colligi ex exem-
 „ plo ipsius Salvatoris , qui non ab initio omnibus ad vitam necessariis
 „ animi donis instructus cum ætate demum profecerit , & corroboratus
 „ fuerit spiritu , ac impletus sapientiâ Luc. 2. v. 40. Hinc quemque
 „ obligari etiam cum jactura bonorum suorum curare , ut animus pro-
 „ ximi ad vitam rectè transigendam & naturæ ordinem observandum
 „ probè informetur

causas matrimoniales insufficientiâ.

9

§. 24. Quartum gradum esse amorem Universi, ut tota natura, creata, quantum in nobis sit, conservetur, quod in statu civili adumbretur amore Reipublicæ, cujus tamen imperium civile jus naturæ ignoret, videlicet ortum ex jure Gentium.

§. 25. Quintum gradum esse amorem vitæ nostræ, pro qua omnibus modis defensio suscipi possit, etiam cum periculô & jacturâ vitæ alienæ.

§. 26. Sextum gradum esse amorem Vitæ proximi. Unde neminem habere jus occidendi hominem, nisi à DEO hoc ipsi concessum, vel vi ipsius naturæ ordinis, vel vi legis per expressam sanctionem latæ, v.g. ob homicidium, adulterium &c. non ob furtum, cum pœna Carolina Art. 162. seqq. sit nimis dura, & Achilleis argumentis oppugnata à Bachovio ad Treutl. V. 2. Disp. 3. th. 3. lit. G.

§. 27. Septimum gradum esse amorem bonorum nostrorum, cum Dominii origo sit juris naturæ, & communio primæva jam dudum ab aliis explosa, utpote impossibilis & contra ordinem naturæ. Quare defensionem rerum nostrarum licitè suscipi etiam cum cade invasoris, si modò per earum subtractionem in præsens vitæ periculum adducar, & aliò modò hoc vitæ periculum averti nequeat.

§. 28. Octavum gradum esse amorem bonorum proximi, quò pertineat, quicquid in decalogi 7. 8. & 9. præcepto jubeatur & prohibeatur.

§. 29. His octo gradibus amoris à Scholasticis recensitis mereri, addi nonum, scilicet amorem cujusvis creaturæ separatim consideratæ, ut in ordine suò, quantum in nobis sit, conservetur, ad quem ordinem ritè observandum vires totius naturæ & singularum creaturarum, usum ac finem naturalem scire ac cognoscere deberemus, quam summam cognitionem in Adamo amissam licet assequi non possimus, attamen, quantum in nobis est, eò niti, & nullam creaturam ex ordine suo turbare debeamus.

§. 30. Ex hoc ergò Jure Naturæ oriri obligationem & instinctum, constringentem & dirigentem omnes creaturas ad ordinem Naturæ servandum & non perturbandum, cum nulla lex propriè dicta sit sine obligatione. Ergò contra Jus Naturæ peccari, si quis de arbore fructus plantasve demat, & non ad usum à naturâ destinatum ab-

„ rumpat, volucres, pisces aliave animalia extra ordinem naturæ ne-
 „ cet. Et verum adeò esse, hominem etiam in bruta delinquere & in-
 „ juriosum esse posse. Prov. 12. v. 10. Deut. 22. v. 1, 4, 6.

§. 31. Nobis, quibus cura est, veritatem à quocunque etiam
 discere, etiam si alterum jam pedem (non in cymba Charontis,
 quod pagani foret, sed) in sepulchro haberemus, incumbit,
 videre, annon ex hoc fundamento deduci queant causæ matri-
 moniales, quatenus ex ex Jure Naturali sunt determinandæ.
 Et faceremus id quidem libenter, si non gravissima dubia nos re-
 tinerent, quæ speramus non graviter acceptum iri à dissentien-
 „ tibus, laudem in eo merentibus, quod *hanc hypothesein subjece-*
 „ *runt lectorum monitis & correctionibus ex placido & sano affectu*
 „ *profectis.*

§. 32. Demonstravit jam Dn. Præses in *Instit. Jurisprud. div.*
L. 1. C. 4. §. 52. ibique latius declaravit usque *ad §. 70.* quod fun-
 damentum Juris Naturæ sit convenientia & disconvenientia,
 cum natura hominis sociali, quatenus ex lumine rectæ rationis
 eadem cognosci potest. Quando igitur affertur §. 18. *periculosum*
esse, si in dictatu rationis quæramus Jus Naturæ, quia tot sensus sint quot
capita, videtur satis apertè confundi dictatum rationis corruptæ
 cum dictatu rationis rectæ. Non enim ex opinionibus cerebrinis
 hominum Jus Naturæ æstimandum, sed ex necessaria connexionē
 & repugnantia cum socialitate humani generis. Ista verò necessi-
 tas vel repugnantia cuilibet, etiā corruptissimo evidenter ostendi
 poterit, ut adeò non opus habeamus *timere monstrosas de Jure Na-*
turæ opiniones, sed ex illo fundamento potius quæcunque opinio-
 nes monstrosæ poterunt refutari, vel si non possint, pro mon-
 strosi non erunt habendæ, etsi fortè contradicant opinionibus
 communissimè receptis.

§. 23. Quod verò additur *ead. §. 18. periculosum & absurdum*
esse, quod in hoc consistat forma & modus promulgandi legem natura-
lem, quod sit omnium mortalium cordibus insitum, fatemur nos non
 intelligere, sed potius metuere, ne alii rectius sentientes pro
 periculoso & absurdo habituri sint, si istam propositionem de-
 fendere sustineremus, postquam videlicet jam suo tempore vas

DEI electum Paulus inculcavit, gentes, quæ legem Mosaicam non habent; aut agnoscunt, factis suis, dum ea, quæ Legis Naturalis sunt, faciunt, ostendere, opus Legis Naturalis inscriptum esse cordibus suis. Rom. II. v. 14, 15. Et quomodo igitur absque summæ temeritatis notâ auderemus Paulum accusare, quod periculofam ac absurdam sententiam de formali ratione Juris Naturæ docuerit. Confer omnino Job. Adami Osiandri typum Legis Naturæ præprimis tb. 41. seqv.

§. 34. Dum verò dicitur §. 19. Juris Naturalis studium consistere in ordine & fine creaturarum omnium, præsupponendum est ante omnia, quod fundamentum Juris Naturæ debeat esse non solum verum, sed & adæquatum ac evidens, prout latius deductum in Instit. Jurisprud. div. L. 1, C. 4. n. 3. seqq. Si verò sententiam hanc de ordine & fine omnium creaturarum consideremus, initio videtur eadem eatenus haut veritati esse conveniens, quatenus Jus Naturæ etiam in bruta & reliquas creaturas omnes homini inferiores cadere asserit. Quomodo enim affirmare possimus jus in creaturas ratione carentes cadere, cum juris nemo capax sit, qui ratione caret. Ipsi dissentientes ajunt, certum esse, juris rationem non dari, nisi per imperium & obligationem, adeoque Juris Naturæ rationem sine imperio & indicatione supremi Numinis nullam esse. At bestix & reliquæ creaturæ ratione carentes obligatione non gaudent, quia intellectu destituuntur, & omnia, quæ agunt, ex necessitate & impetu agunt.

§. 35. Videmus equidem, in contrarium afferri à dissentientibus; definitionem Juris Naturæ Ulpianeam l. 1. §. 3. de J. & J. & ab Imperatore repetitam pr. Inst. de J. N. G. & C. adeò absurdam non esse, quia omnes res creatæ in certo ordine sint constitutæ. Atqui frustra instrueretur ordo, nisi quoque conservaretur. Docuisse igitur Naturam non solum homines, sed etiam bruta & inferiores creaturas, ut secundum ordinem actus suos instituant, homines quidem cum cognitione juris obligantis, bruta verò & reliquas creaturas, ex naturali impetu sine tali cognitione, quod qui negare ausus fuerit, eum videri nunquam legisse, quæ Salomo de formicis Prov. VI. v. 6, 7, 8. & de apibus Virgil. Lib. 4. Georg. miranda retulerint. Sed ista quidem parùm movent.

Nam qui ista de formicis & apibus legit, nihil amplius legit, quàm quod formicæ & apes agant voluntatem DEI ex naturali impetu sine cognitione legislatoris. At hoc non erat in quæstione: Illud verò, quod in quæstione est, legere nemo apud istos autores potuit, cùm id non tradant, apes scil. & formicas agere secundum legem propriè dictam & ex obligatione. Impetu verò agere & secundum legem agere sunt opposita.

§. 86. Quod si porro ea, quæ ex impetu naturali fiunt, pro Jure Naturali forent habenda, ea etiam omnia Juris Naturæ forent, quæ tamen omnium hominum consensu pro talibus habentur, quæ Juri Naturæ repugnant. Ita impetus naturalis quosdam homines impellit ad delicta voluptatis, scortationem, adulterium, ebrietatem &c. alios ad delicta avaritiæ: furta, rapinas, mendacia, calumnias &c. alios ad crimina ambitionis, homicidia, vindictas, injurias &c.

§. 37. Nec multum juvaret, si diceres, distingvendum esse inter impetum bestiarum & impetum hominum. Hunc non, facere Jus Naturale, illum facere. Nam hæc responsio nova dubia plura produceret. Initiò enim videretur potius dicendum esse, aut humanum impetum multò magis facere Jus Naturæ, si impetus bestiarum id facit: aut si humanus impetus Jus Naturæ non est, nec impetum bestiarum esse pro Jure Naturæ habendum. Quod si enim homo est nobilior creatura bestiis, ejus natura quoque erit nobilior, & consequenter hujus naturæ nobilioris instinctus non producet effectum ignobiliorem, quàm instinctus naturæ bestialis. Si verò naturæ humanæ tanquam nobilioris instinctus ad Jus Naturale non est sufficiens, multò minus Jus Naturæ faciet instinctus naturæ ignobilioris.

§. 38. At, fortè inquires, separandum in homine esse instinctum naturæ rationalis, ab instinctu bestialis, si quam cum bestiis communem habet. Priorem in homine facere jus Naturæ, posteriorem minus. Hic equidem nos facile propius tibi accederemus. Sed dissentientes illâ distinctione uti non poterunt. Quomodo enim illi instinctui hominis rationali possent adscribere Jus Naturæ, qui pro periculosâ sententiâ habent

bent, quærere Jus Naturæ in dictatu rationis. Aut quomodo iidem instinctus hominis bestiales possent non habere pro Jure Naturæ, qui ingenere instinctus bestiarum pro Jure Naturæ ventilant.

§. 39. Sed tamen, ita fortè pergent, poterit instinctus bestiarum in bestiis esse Jus Naturæ [sc. bestialis] qui tamen in hominè est contra Jus Naturæ, quia homo non debet esse bestia. Ita v.g. incestus inter bestias non datur, neque scortatio, neque adulterium, at inter homines instinctus aliter debet esse comparatus. Age videamus, an & hæc in universum procedant. Bestia quæ ex impetu suæ naturæ damnum dat, bos cornupeta ex instinctu suæ naturæ hominem interficiens an secundum Jus Naturæ facit an minus? Si prius, cur homini domino bestię imputatur istud factum tanquam crimen vel culpa, i.e. tanquam contra Jus Naturæ? Si posterius, dabitur utique impetus naturalis in bestiâ Juri naturæ adversus.

§. 40. Fortè & hic dices, bovem quidem cornupetam hominem interficientem agere secundum jus suæ naturæ, adeoque hoc factum non imputari Domino ejus; sed naturæ humanæ convenire, ut actiones naturæ bestialis nocivas aliis hominibus dirigat aut reprimat, atque adeo neglectum hujus officii imputari Domino. Hic verò, ut taceam, lege divinâ ipsum bovem cornupetam, hominem interficientem, juberi occidi, pareret hoc effugium novum dubium, quâ ratione scilicet fieri possit, ut Jus Naturæ humanæ repugnet juri naturæ bestialis, cum nullum Jus Naturæ contradicat alteri, & cum dissidentes velint, ab homine non reprimi debere ordinem aut instinctum naturæ in creaturis reliquis; sed potius conservari.

§. 41. Et ista quidem dubia contra veritatem istius fundamenti de Jure Naturæ in Ordine Naturæ quærendo sufficere poterunt. Circa adæquationem non minora occurrunt. Neque enim omnis Ordo Naturæ est Jus Naturæ, neque omne quod ordini Naturæ adversum est, repugnat juri Naturæ, etsi fortè id concedere possimus, Jus Naturæ conservare ordinem pacificum & tranquillum naturæ. Quod non omnis ordo Naturæ sit jus

Naturæ, ex dictis videtur fluere, quatenus videlicet omnis ordo naturæ creaturarum infra hominem ad legem & jus propriè dictum non pertinet. Sed etiam facilè monstrari potest, non omne quod ordini naturæ adversum est, repugnare etiam juri naturæ, etiam si ipsum hominem ejusque naturam consideres.

§. 42. V.g. Ordo naturæ humanæ est, ut ore loquatur, manibus operetur aliquid, cibo per os in stomachum assumptò corpus nutriat, excrementa per partes posticas ejiciat. Quid magis huic ordini adversum est, quam per alvum assumere alimenta, per os ejicere excrementa ciborum? Et tamen Juri Naturæ non repugnat, si gutturis inflammatio prohibeat cibi assumptionem per os, hominem nutrire per clysteres; neque repugnat vomitum medicamentis provocare. Ut de manibus taceam, quæ scribendo oris vices supplent.

§. 43. Quod si tamen & verum & adæquatum esset hoc fundamentum, parùm tamen prodesset, si idem non esset evidens h. e. si non omni homini adulto ac sanæ mentis posset ostendi, hoc repugnare ordini naturæ, ergo esse jure naturali prohibitum; illud promovere ordinem naturæ, igitur esse præceptum. At præterquam quod ipsi dissentientes fateantur *obscuram esse homini & parum cognitam naturam reliquarum creaturarum*, quid obscurius est, & difficiliori disquisitioni obnoxium, quid sit et in quo consistat natura humana. Dubitamus an duæ sint, an tres partes hominis, an fortè plures? Et in tantum dubitamus ac disceptamus, ut ad hæresin referamus alteram ex his sententiis, quia videlicet alteram ad articulos fidei retulimus, in-dicio, quod de partibus hominis nihil sciamus, sed unius alteri credamus. Quomodò verò sciremus, quid sit corpus hominis, quamdiu dubitamus quid sit corpus in genere? Quomodò sciremus, quid sit anima hominis, quamdiu dubitamus, quid sit spiritus in genere? Denique cum ordinem naturæ dissentientes eundem esse cum fine velint, quomodò sciremus quis sit ultimus finis hominis, quamdiu dubitamus, an non & rubens in vitrò vinum, annon delicatus cibus, an non res Venerea, an non

non honor & existimatio, an non divitiæ pertineant ad finem seu bonum hominis?

§. 44. Transeant tamen ista. Ordo vocabulum est, quod non solum Deum autorem agnoscit sed et hominem. Differunt tamen valde ordo naturæ & ordo humanus. Ille immobilis est certè intuitu hominis, soli arbitrio divino subjacens. At ordo humanus arbitrarius est ac mutabilis; perinde ut Jus Naturæ est immutabile, jus humanum mutabile. Jam, quæso quodnam signum evidens fecernendi ordinem naturæ ubique ab ordine humano? immutabile à mutabili? Nihil notius, quàm consuetudinem esse alteram naturam. Attamen consuetudo talis semper ad ordinem humanum pertinet. An ergo simul erit Juris Naturæ, quatenus altera natura est consuetudo, simul verò Juris arbitrarii, quatenus consuetudo ab hominibus ortum habet? Quid quod in quibusdam negotiis ordo humanus & ordo Naturæ seu divinus immixti sunt, qualia rectè Grotius dicit esse juris naturalis non absoluti sed ex hypothesisi. Ita etiam in ipsâ Scripturâ Magistratus dicitur modò ordinatio divina modò ordinatio humana. Ut taceam, depravatos mores hominum sæpè mentiri jus naturæ h. e. ordinem humanum haberi pro ordine naturæ. Sic apud omnes gentes veræ virtutes nomina vitiorum, vitia nomina virtutum nata sunt. Prodigus liberalis dicitur; Avarus parcus & vice versâ. Crudelis severus, intemperans hilaris &c.

§. 45. Vereor autem, ne rem magis obscuriorem reddas, si cum dissentientibus distingvere velis inter *Virtutes Juris Naturæ & Juris Gentium, & Pacta & Contractus, item omnem penè justitiâ ad Jus Gentium referas, temperantiâ & veritatem verò ad Jus Naturæ.* (vid. supra §. 19.) Nam præter alia dubia, quæ hic opponi possunt, daretur hoc pactò Jus Naturæ absque justitiâ, quod satis inconveniens videtur. Et, si omnia illa, quæ hominum facta præsupponunt, non essent Juris naturalis, sed Juris Gentium, vereor ut Temperantiâ circa cibum & potum Juri Naturæ remansura sit, cum homines communiter cibò & potu utantur, non quales natura producit, sed artibus humanis præparatis. *Quin & Veritas*

ritas quoad plurimos casus ad jus gentium referenda foret, si Pactorum & Contractuum observatio à Jure Naturæ exulare debeat, adeoque quid remaneret huic Juri Naturæ? Ut adeò ista sententia de hâc Juris Naturæ & Gentium distinctione nullum alium videatur præbere usum, quàm ut distinctio Juris æquivoca, Juris scil. Naturæ improprie & proprie dicti efferatur per terminos divisionis univocæ, cum istud Jus Naturæ Juri Gentium hâc pacto contradistinctum nihil aliud sit, quàm instinctus naturalis & jus impropriissimè dictum, jus autem quod Gentium dicitur, jus Naturæ verè tale.

§. 46. Et quid opus est verbis? Ipsi dissentientes fatentur, istum ordinem esse principium obscurum, cum allatum sit (§. 20.) *difficile esse exprimere, quâ ratione circa actiones naturales rectè sese gerere debeat homo ob depravatam per lapsum primorum parentum cognitionem rationis humanæ, ut usum ac ordinem omnium creaturarum non nisi quasi per umbram aliquatenus cognoscere possimus.* Nescio enim, an non satis apertè hic fateantur Fautores hujus principii, istam doctrinam saltem esse umbram verorum fundamentorum Juris Naturæ.

§. 47. Etsi verò facilè concedamus, *amorem esse unicum naturæ vinculum, eundemque unicum hominis affectum, in cujus rectâ gubernatione omnis virtus & verum honestum consistat*, nondum tamen apparet, quomodo ex cognitione amoris deducenda sit cognitio Juris Naturæ, cujus etiam participes sint reliquæ creaturæ omnes. An etiam in formicis & apibus, an in arboribus &c. datur ex mente dissentientium amor? Certè Scholastici, ex quibus gradus amoris deducuntur (§. 20. seqq.) non nisi amorem improprie dictum agnoscunt in plantis & inferioribus creaturis. Unde & improprietas hujus Juris Naturæ iterum denudaretur.

§. 48. Quod si dicas, amorem uti unicum ita & unius seu potius solius hominis affectum esse, dubitare quis posset, an non Autores hujus sententiæ tradant suum Jus Gentium, dum tradere volunt Jus Naturæ, utpote quod à Jure Naturæ differabat, quod illud respiceret actus homini proprios; hoc actus toti naturæ creatæ communes. Quod si dicas, amorem diffusum esse

per

per omnes creaturas, sequeretur, eundem esse finem hominis & reliquarum creaturarum, adeoque etiam idem jus esse debere, & consequenter bruta etiam committere adulteria & incestus uti homines.

§. 49. Imò, si Amor est fundamentum Juris Naturæ, si Amor est ille ordo propositus, nihil novi fuit adductum, sed idem dixerunt jam alii, Cicero, Grotius, Pufendorfius, Cumberlandius, qui ex benevolentia communi humani generis, seu ex Socialitate Jus Naturæ deducunt. Socialitas enim est amor humani generis. Ostendemus verò in istis octo gradibus amoris supra recensitis nil nisi amorem hominum accuratè loquendo, fuisse adductum.

§. 50. *Primus enim gradus s. Amor Dei, per quem obligemur ad ejus cultum, ipsis fatentibus (§. 21.) non pertinet ad jus Naturæ, cum Jus Natura non præscribat modum colendi, sed hic dependeat ab ipsius Dei revelatione.*

§. 51. Quâ occasione simul observo, quod defensores illius hypotheseos cognitionem Juris Naturæ non petant ex revelatione, (& rectè, ne videlicet confundant Jus divinum naturale cum Jure divinò positivò) sed inde novum mihi oritur dubium. Unde ergo? Principia cognoscendi homo non habet nisi duo: Lumen Naturæ & Lumen Revelationis. Ergò non poterunt non petere ex lumine Naturæ. Lumen verò Naturæ est dictatum rationis. At verò secundum eos periculosum & absurdum est in dictatò rectæ rationis quærere jus Naturæ.

§. 52. Quod additur, (§. 21.) *Modum colendi Deum dependere certò modò à dispositione Majestatis civilis, scil. ut intelligimus, circa Adiaphora, item errantes circa cultum Dei mitius esse tractandos. h. e. ut ipsi se explicant dissentientes, in cultu Religioso, etiam aberrantes à verò commiseratione quàm odio dignores esse nec damnandos.* In eò quidem nos contra communem sententiam habebunt consentientes, sed exinde tamen nihil afferri potest, quod primus hic gradus amoris pertineat ad Jus Naturæ.

§. 53. Quare non intelligimus, quando subjicitur (*supra §. 12.*) *secundum hunc Amoris gradum, quantum ad Jus Naturæ attinet,*

attinet, omnem creaturam tam in nobis quam extra nos adhibendam primario ad gloriam Dei. Si enim per amorem Dei obligamur ad Ejus cultum, & colendi modum Jus Naturæ ignorat, non video, quomodo Juri Naturæ tribui possit conclusio aliqua circa hunc Amoris gradum.

§. 54. Si verò urgeas, colendum esse Deum, dictari à Jure Naturæ, quomodo colendus sit, pertinere ad Jus Positivum, reponimus, quod ipsi dissentientes alibi habent, ad Jus Naturæ non referenda esse æternæ veritatis Principia v. g. bonum sectandum, malum fugiendum, (Deum esse colendum:) Hæc enim, utut in se vera sint, propriè jus non inducunt, sed saltem sunt notiones sive propositiones jus aliquod præsupponentes, cum ex eò, quod sciam, bonum esse, sectandum (Deum esse colendum) non possim in hypothesis concludere, quid bonum quidve agendum, (quomodo Deus colendus) sit. Unde suò locò ostendit Dn. Præses, principium practicum: Deo esse parendum, ex quò deducitur omnis cultus Dei, antecedere Jus Naturæ. Vid. *Instit. Jurisprud. L. 1. C. 3. §. 41. seqq.*

§. 55. Aut ergò ista adhibitio creaturarum ad gloriam Dei Jure Naturæ dicta, pertinet admodum colendi Deum, aut non pertinet. Si pertinet, falsum esset, Jus Naturæ nihil præscribere de modo colendi Deum; si non pertinet, ex Amore Dei homo ad aliud quid præter ejus cultum obligatur, quod tamen pertinet ad Ordinem Naturæ tanquam fundamentum Juris Naturæ. Nihil tamen hoc præceptò lucramur in Jurisprudencia naturali, si id non intelligimus.

§. 56. Gloria Dei haut dubie ab ejus voluntate dependet; aut si mavis, ex ejus natura, non ex naturâ seu voluntate hominis. Naturam Dei tanquam Entis imperscrutabilis multò minus novit homo lapsus, quàm naturam creaturarum reliquarum, ergò nec novit citra revelationem modum, quem Deus in usu creaturarum ad sui gloriam adhiberi vult. Unde iterum hoc præceptum pertineret ad Jus Positivum, non naturale. Neque enim dici potest, creaturas secundum ordinem suum & finem esse adhibendas, quem tamen homo non cognoscit. Et esset hoc petitio principii aut diductio in circulum,

§. 57. Nobis sanè periculosum videtur, gloriam Dei, separatam ab amore hominum, inculcare hominibus tanquam peculiare præceptum Juris Naturæ, cum hõc pactõ nihil aliud consequamur, quàm contemptum nominis divini ejusque abusus, ad quem homo jam suâ sponte pronus est. Quotusquisque enim vel in actibus voluptatis, vel avaritiæ, vel ambitionis, non in nomine Dei eosdem suscipit, aut exinde in Deum gloriam aliquam redundaturam esse sibi non persvadet? Hos verò, quomodò citra scripturam erroris convincas, nisi ostendas, eorum actiones turbare amorem humani generis.

§. 58. Quod igitur *secundum gradum amoris concernit, qui in amore anima nostræ ad commodè transigendam vitam & affectus corporis secundum rectam rationem dirigendos ponitur, (supra §. 22.)* initio obscurius positum est, an commoda vita sit diversum quid ab ea, quæ habet affectus sedatos. Nam si ut diversum quid proponeretur, cavendum esset, ne quis sub vitâ commodâ intelligat vitam ex cibõ & potu aut aliarum rerum abundantia delectationem capientem, quæ profectò non esset cura animæ, sed corporis directioni affectuum maximè noxia.

§. 59. Deinde quod additur: *hominem consequi summum bonum morale, si anima secundum ordinem naturæ & rectam rationem dirigat affectus*, uti quidem suõ modõ verum est, ita tamen non senserunt Autores hypotheseos, lectorem in circulum duci: Fons Juris Naturæ est ordo creaturarum. Ordo creaturarum difficulter cognoscitur. Cognoscitur tamen ex gradibus Amoris. Inter illos est amor animæ. Hõc amore curandum est, ut anima dirigat affectus. Directio affectuum debet fieri secundum ordinem Naturæ. Vides, quod iterum in puncto circuli sumus, unde discesimus.

§. 60. At tamen *ordini naturæ* hic adjecta est *recta ratio*. Benè. Hæc ergò vel eadem cum ordine naturæ, vel diversa. Si eadem, eadem manet circumductio in circulum; si diversa, falsum est, cognoscendi principium in Jure Naturæ solum esse ordinem Naturæ, cum ipsi Autores ita fateantur, præter ordinem Naturæ, rectam rationem esse principium evidentius. Semper

tamen hic ipsemet obstabit, quod de incertitudine rectæ rationis posuerunt (§. 18.)

§. 61. Porro cum dicitur: *Summum bonum morale esse constantem voluptatem animi, quæ secundum Epicurum rectè consistat in vita secundum naturam & carentia doloris*, pauca quidem dubia hic contrahemus, nisi quod melius esset, in gratiam discentium, qui, dum Epicurum audiunt, magis in mente habere solent Epicuri de grege porcos, admoneri, per vitam secundum naturam non intelligendam esse vitam omnibus rebus abundantem, quas naturalis homo concupiscit, & per carentiam doloris, non intelligi dolores, qui oriuntur ex carentia cibi delicati, vini, fœminarum, honoris, pecuniæ, sed intelligi dolorem positivum ex vulneratione v.g. oriundum. Epicurus enim erat pocillator aquæ & comestor leguminum, aut panis, nullâ pecuniâ abundans, nullâ dignitate conspicuus.

§. 62. Eâdem admonitione opus erit, cum Epicuro Salomon fortè non ita commodè jungitur, *hominem nil melius habere asserens sub sole, quàm edere, bibere & gaudere*. Nam monendum maximè, ne discentes istam conjunctionem Salomonis cum Epicuro legentes cogitent de Symbolo Sardanapali Epicurei ante, Epicurum: *Ede, bibe, lude, post mortem nulla voluptas*. Unde mallems, non omissum fuisse, quod Salomon addit non sine causa: Homini nihil melius esse, quàm gaudere in omni suo labore. Loquitur enim de esu & potu cum gaudio non otiosorum hominum, & qui vivunt, ut edant & bibant, sed eorum, qui edunt, ut vivant, & qui in labore suo gaudent, non qui post labores paucos sardanapalizant.

§. 63. In tertio amoris gradu, qui suprâ ponebatur in amore animi proximi (§. 23.) mallems, quod iste non in cultura sola intellectus proximi fuisset absolutus. Dum enim dicitur: *Animam ab initio esse instar tabulæ rasæ, hinc quemque obligari, ut animus proximi probè informetur*, id non nisi de intellectu hominis intelligi potest; nam intuitu Voluntatis hominis anima non est instar tabulæ rasæ, sed à primo vitæ momento anima gaudet suis affecti-

affectibus ab aliorum hominum educatione, vel exemplô non dependentibus. Et curandum adeo magis, ut Voluntas proximi emendetur, quàm ut ejus intellectus, cum facilè quis videat, quid bonum aut malum sit aliis, suum autem malum ferè pro bono habeat. At hæc cura etsi summum beneficium sit, quod alteri exhibere possumus, & communiter tamen negligitur, & communiter, etiam à docentibus, quod mireris, habetur pro summa injuriâ.

§. 64. Illud autem concoquere non possumus, (absque ira tamen,) quod additur (*d. §. 23.*) *Elingve, nudum & ad omnem societatem ineptum, imò animal, quò nullum miserius esset, si citra aliorum curam viveret, etiam hominem futurum fuisse, etiamsi in primævo statu permansisset.* Quid enim? An Adam antequam Eva crearetur, tale miserum animal fuit? & quis ejus Magister? An Eva loqui didicit ab Adamô, an ejus animus ad vitam rectè transigendam & naturæ ordinem observandum probè ab Adamo informatus est? An non infantes, si qui in statu primævô fuissent nati, æquali perfectione animi fuissent præditi, quâ à primâ creatione gavisi sunt primi parentes?

§. 65. Sed, ais, ista tamen sententia non ineptè colligitur ex exemplo ipsius Salvatoris, qui non ab initio omnibus ad vitam necessariis animi donis instructus cum atate demum profecit, & corroboratus fuerit Spiritu ac impletus Sapientiâ. Veremur, ne alii vehementius adversus hanc doctrinam insurrecturi, & tristius aliquod crimen latere clamaturi sint. Nobis verò, qui cum dissentientibus sentimus, aberrantes à verò etiam in rebus divinis magis commiseratione quàm odiò dignos esse, sufficiat, si ostenderimus, istam collectionem parùm aptam esse: partim quod à statu Salvatoris in exinatione ad statum hominis integri non valeat illatio, cum Christus assumeret imbecillitatem carnis nostræ, sed absque peccato, *Rom. VIII. v. 3. Hebr. II. v. 14. C. IV. v. 15.* partim quod horreamus dicere, Christum ab initio non omnibus animi (i. e. Voluntatis) donis ad vitam necessariis instructum fuisse. Nam etiam aliquis, qui jam necessaria possidet, in iis augmentum capere potest; partim denique, quod isti profectus Salvatoris in Spiritu

& sapientiâ non attribuendi sint, curæ humanæ, sed originem debeant Spiritui Sancto, in ipso quoad plenitudinem inhabitanti. *Coloss. I. v. 19.*

§. 66. *Quartum amoris gradum*, fatemur nos non intelligere, & in quo consistat ille *amor universi*, ut *tota natura*, quantum in nobis sit, conservetur, id quod in statu civili adumbretur amore *Reipubl.* (vid. *suprà* §. 24.) Homo enim ne pediculum quidem conservare potest. Quod si intelligatur usus omnium creaturarum secundum suos fines, pertineret hoc ad primum gradum, non demum hic ad quartum (*conf. suprà* §. 53.) id, quod etiam patet ex amore *Reipubl.* hic in exemplum adducto: qui uti præferendus est utilitati & amorì privato; ita & iste amor universi anteponeendus foret amorì singularum creaturarum. At tùm eadem hic monenda forent, quæ jam *suprà* de gradu amoris primò diximus. d. §. 53. *sequ.*

§. 67. De quinto gradu & amore vitæ nostræ, quod moneamus, nihil habemus, nisi quod non videam, quomodo connecti possit cum gradu tertio. Si enim demum in quinto gradu *pro vitâ propriâ defensionem suscipere possumus etiam cum periculo & jacturâ vitæ aliene* (vid. §. 25.) & amor animæ proximi tanquam in tertio gradu positus amorem vitæ nostræ præcedit, sequeretur, innocentes & ex justo errore vitam nostram impetentes, item claudos, infantes innoxios, fugam nostram innocenter impediētes justè pro servandâ vitâ interfici posse, sceleratissimum nequam & latronem, ut evitetur ejus animæ periculum, non posse, quod quomodò cohæreat, non videmus.

§. 68. Quoad sextum gradum, qui *suprà* (§. 26.) ponebatur in amore vitæ proximi, etsi concedamus illationem, quod *nemo habeat jus occidendi hominem nisi hoc ipsi à DEO concessum sit, vel vi ipsius ordinis naturæ, vel vi legis per expressam sanctionem lata, i. e.* non licere hominem interficere, nisi quatenus concedat Jus naturale aut divinum positivum, non tamen consentimus in subjuncto exemplo, quod non liceat ob furtum aliquem suspendere aut interficere, &, si Achillea sunt argumenta, quibus hanc pœnam oppugnavit *Bachovius*, recordandum erat, Achillem absque arte & labore à Paride sagittâ in calcaneò fuisse interemtum.

§. 69. Circa amorem bonorum nostrorum, qui gradus septimus amoris ponebatur (§. 27.) monendum, hunc amorem, si abstrahatur ab amore animi & vitæ nostræ, aut proximi nostri, & ut distinctus amoris gradus consideretur, esse amorem irrationalem, cum bona omnia, quæ bona fortunæ dicuntur, sint bona impropriissimè dicta, nisi quatenus vitæ humanæ inserviunt. Unde & rectè subjungitur, *tum demum defensionem rerum nostrarum cum cede invasoris licitè suscipi, si per earum subtractionem adducar in præsens vitæ periculum*, indicio, hoc exemplum non illustrare septimum hunc amoris gradum, sed quintum.

§. 70. Quod autem admiscetur, *Dominii originem esse Juris Naturæ & communionem primævam jam dudum ab aliis esse explosam, tanquàm impossibilem & contra ordinem naturæ*, id tam diu nobis persuaderi non patiemur, quamdiu rationibus non est responsum, quibus in *instit. Jurispr. div. L. 2. C. 10. §. 30. seqq.* ostensum, hanc sententiam impingere in prima Philosophiæ Moralis rudimenta ac definitiones Juris ac Dominii. Ut taceamus, parùm cohærere hanc assertionem cum illa, quam supra tetigimus, quod Pacta non sint Juris Naturæ, sed Juris Gentium, cum tamen Pactorum usus etiam possit esse in communione aut, citra respectum ad bona fortunæ, intuitu bonorum corporis ac animi, Dominii verò usus inter plures sine commerciis, adeoque sine Pactis nullus sit, aut certè exiguus.

§. 71. Octavum verò gradum amoris nollem dicere amorem bonorum proximi, si huc pertinere debet, *quicquid in Decalogi 7, 8, 9. præcepto jubetur & prohibetur. (vid. 28.)* Nam ex amore bonorum proximi oriuntur furta, fraudes, mendacia, rapinæ. Qui verò inculcatur in dictis præceptis amor, est amor vitæ & animæ proximi declarandus per actiones circa ejus bona. Quare hic gradus nequaquam separandus est à gradu tertio & sexto.

§. 72. Uti verò per hætenus dicta probavimus satis assertum nostrum, (*suprà §. 49.*) octo illos Scholasticorum gradus amoris, quatenus ad Jus Naturæ pertinent, nihil solidi continere, nisi amorem hominum seu socialitatem; ita causam non videmus, cur Autores hypotheseos de Ordine Naturæ nonum gradum prioribus

bus superaddant, *amorem videlicet cujusvis creatura separatim considerate* (vid. *suprà* §. 29.) Cum enim hic gradus sit idem cum gradu Scholasticorum quartò, & jam ostenderimus, istum quartum gradum coincidere cum gradu primo, documento nobis id esse poterit, quàm insufficiens sit hæc doctrina de gradibus amoris ad illustrationem doctrinæ de ordine creaturarum, cum idem gradus modò dicatur esse reliquis omnibus præponendus, modò in medio collocetur, modò postponatur reliquis omnibus.

§. 73. Et ni fallor, ipsi Autores hujus hypotheseos incertitudinem ejus, atque obscuritatem iterum satis apertè confitentur; dum (§. 29.) subjiciunt: *ad hunc ordinem ritè observandum vires totius naturæ & singularum creaturarum usum ac finem naturalem scire & cognoscere deberemus, quam summam cognitionem in Adamo amissam assequi non possumus.* Quâ occasione tamen simul id annotamus, si cognitio ista summa in Adamo amissa fuit, sequitur, quod Adamus ante amissionem illam habuerit. Si habuit, à nullo hominum haurire illam potuit, nisi Præ-Adamitas statuere velimus. Si habuit, & à nullo homine hausit, habuit à Deo. Si habuit à Deo, falsum est, quod & jam *suprà* §. 64. impugnavimus, hominem, si citra aliorum curam viveret, etiam si in primævo statu permansisset, futurum fuisse elingve; nudum, & ad omnem societatem ineptum, imò talè animal, quò nullum miserius esset.

§. 74. Et si igitur addatur: (*suprà* §. 29.) *Licet assequi non possumus summam istam cognitionem in Adamo amissam, attamen nos, quantum in nobis est, eò niti debere, ut nullam creaturam ex ordine suo turbare debeamus;* non videtur tamen mihi ista de incertitudine hypotheseos confessio propria hoc pacto salvari posse aut infringi. Esset enim reverà adhortatio discipulorum, ut anniti deberent ad id, quod consequi non possunt, h. e. ut laborem frustraneum suscipiant, aut quod in proverbio est, *Æthiopem abluant.* Quod si fortè afferretur, non esse scientiam hanc amissam in totum, sed saltem quoad *summitatem perfectionis*, qualis in Adamo fuit, parum tamen id adjuvaret ipsam hypothesein. Debuissent enim poni ab Autoribus hypotheseos ista fundamenta, ex quibus ista
cogni-

cognitio in tantum saltem addisci posset. Quô non factô, manet illa hypothesis incerta & dubia.

§. 75. Videmus quidem ultimò, quasdam conclusiones ex istis principiis afferri (§. 30.) scil. *contra Jus Naturæ peccari, si quis fructibus arboris utatur non ad usum à natura destinatum, si quis volucres, pisces aliave animalia extra ordinem naturæ necet.* Sed ex istis conclusionibus nemo eruditur, qui nescit determinationem casuum, quando scilicet fructus arborum contra usum à natura destinatum usurpentur, aut quando animalia contra ordinem naturæ necentur, quod tam diu nescire habet necesse, quamdiu nulla norma ostenditur, ad quam cognitio de ordine creaturarum expendatur.

§. 76. Ad hominem hic disputamus. Nam quomodo ex nostra hypothesis de primis principiis practicis & custodiâ Socialitatis, tanquam fundamento Juris Naturæ doctrina de usu & abusu creaturarum debeat exponi, dictum jam est in *Instit. Jurispr. div. L. 2. C. 10. §. 20. & seqq. juncto L. 1. C. 4. §. 77.* Unde simul patebit, nec id sine monito esse dimittendum, quando exindè ultimò infertur, *quod verum adeò sit, hominem etiam in bruta delinquere & injuriosum esse posse, Prov. XII. v. 10. Deuter. XXII. v. 1, 4, 6.* Nam id quidem in dictis Scripturæ locis non asseritur, sed quod debeamus proximo etiam succurrere intuitu bestiarum, ejus, quod debeamus avem matrem non simul cum pullis eximere è nidò, sed matrem dimittere, quod justus etiam misericordiam exerceat erga pecus suum. Quod si hæc quis non faciat, injuriam non facit bestiis, sed homini cujus sunt bestia, sed DEO, qui talia præcepit.

§. 77. Et ita quidem obscuram atque incertam putamus esse hanc hypothesis, ut ex ea dubiæ reddi possint sententiæ circa moralitatem actionum, de quarum moralitate nemo dubitat. Quid enim: an v. g. licebit Jure Naturæ vinum bibere? Sanè vinum non est creatura, sed res arte facta. Ante Noachum vini usus in potu nullus erat *Gen. IX. v. 20.* ergo tùm ex ordine Naturæ aquam potabant homines. Igitur contra hunc ordinem vinum introductum est. An licebit navigare? Est contra ordinem

dinem naturæ, ut homo transeat aquam, & in aqua quasi degat. An licet lapidem sursum projicere? Est contra ordinem naturæ. Lapis enim naturâ suâ, ut omne corpus grave descendit, non adscendit. An licebit fornacibus uti noviter inventis fumum quasi absorbentibus, in quibus flamma contra ordinem naturæ descendit? &c.

§. 78. Potissimum verò in causis matrimonialibus, quorum gratiâ hætenus eam hypothesein discusimus, vix videtur eadem sufficiens fundamentum præbere, cui tutò inniti possis, sed modò dicta quæstiones jam satis intricatas magis dubias reddere. Ita fatemur, nos non intelligere, quando ex illa hypothese inferitur, *quod Pontifex, dum meretricem ex lupanari ducere commendat, pium patientiæ studium inculcet, quod ad summum fortè amoris gradum sit referendum.* Non enim percipimus, quò pactò factum ejusmodi in istis octo aut novem amoris gradibus hætenus recensitis ad cultum DEI, aut etiam amorem animæ nostræ, qui suprâ constituebantur summi gradus amoris, referri possit.

§. 79. Ita cum dicitur porrò: *Jus Naturæ in linea recta propter ordinem naturæ & reverentiam parentibus à liberis debitam prohibere,* initio dubites, an reverentia hic sit nova & diversa ratio ab ordine naturæ, an eadem. Si prius assumas, Jus Naturæ præter ordinem naturæ adhuc alia habebit fundamenta; si posterius, dilucidè fuit ostensum à Dn. Præsid. in *Instit. jurisprudent. div. Lib. 3. C. 2. §. 230. seqq.* ex reverentiæ debitò infirmum contra hunc incestum strui argumentum. Videntur autem dissentientes per ordinem naturæ hic diversum quid à reverentiæ debitò intellexisse, scilicet diversitatem ætatis. Sed hanc non esse causam incestûs hujus prohibiti, exinde patet, quod v. g. homo circiter quadraginta annorum, si ducat fœminam viginti annorum non turbet ordinem naturæ: at ea ætatis differentia potest esse inter quendam patrem & quandam filiam, & tamen incestus manebit.

§. 80. Porrò video equidem, quod ex illo ordine naturæ ad matrimonium applicatò deducatur ista conclusio: *Senem enervatum cum puella matrimonium inire non posse, & hinc cum tali adulterium non committi.* Sed contrà tamen pro matrimonio senum disse-

differuit Dn. Præses d. l. §. 188. 196. seq. & si fidem seni dederit puella, adulterium utique committetur, quia adulterium est violatio fidei conjugalis. Confer. 1. Reg. I. vers. 2, 3, 4. junct. Cap. II. v. 17. & 22.

§. 81. Ulterius asseritur equidem, quod nemo dubitet, matrimonium esse Juris Naturæ, uti nec nos dubitamus, accipimus tamen rationem dubitandi exinde, quod subjungitur: *Non concubitus neque nudum consensum, sed consensum ritè factâ traditione facere matrimonium.* Nam si per pactum initur matrimonium, matrimonium ex illa hypothese non erit Juris Naturæ, utpote cum supra inculcatum fuerit, Pacta non esse Juris Naturæ, sed Juris Gentium.

§. 82. Vellem autem scire, quomodò ex ordine naturæ demonstraretur, quod traditio requiratur ad essentiam matrimonii. Nam à Dominio rerum ad jura personarum nulla est illatio firma. Fides conjugalis non est res in commercio. Et si esset, cur non æquè matrimonium possit referri ad contractus consensuales, quàm ad reales. Promittitur in sponsalibus de præsentī fides conjugalis absque tamen traditione, cur non ergò in sponsam ejusmodi posset committi adulterium? Conf. Deut. XXII. v. 23.

§. 83. Ex dictis verò simul patet, quàm convenienter defendatur ex ista hypothese communis quorundam sententia: *Si duo sponsalia de præsentī vulgò dicta publicè sint celebrata, posteriora præferri, si his accesserit benedictio Sacerdotalis, non quidem propter hanc, sed propter traditionem ritè factam, quæ illam concommitetur, licet etiam prioribus accesserit concubitus.* Quemadmodum enim hanc assertionem contra Carpzovium eruditè impugnavit Illustr. Dn. Ordinarius Strykius in *Dissertat. de Concursu Sponsaliorum* c. 2. n. 22. seq. & ad fundamentum ejus jam responsum est §. anteced. ita & adversus eam pronunciavit mense præcedente Facultas Juridica Halensis unâ cum Facultate Theologica Paderbornam versus.

§. 84. Sufficere ista poterunt de hypothese istâ peculiari de Jure Naturæ. Præter Jus Naturæ verò ex Jure divino positivo universali multa deduxit Dn. Præses in causis matrimonialibus

Instit. Jurispr. Div. Lib. 3. Cap. 2. & 3. per integr. Postquam enim multa, quæ in causis matrimonialibus haud dubiè divinæ voluntati non conveniunt, Theologi & Jcti ad Jus Naturæ ejusque prohibitionem retulerant, præter Jus Naturæ nullum Jus divinum positivum universale agnoscentes, & verò hoc seculò in quæstione de polygamia defensores ejusdem satis evidenter ostenderent, polygamiam Juri Naturæ non repugnare, cogebantur Theologorum & Jctorum prudentiores, ut defensoribus polygamix eò fortius resistere possent, ad Jus divinum positivum universale refugere, quam Juris divini speciem jam suo tempore Grotius inculcaverat *de J. B. & P. L. I. C. I. §. 15.* neglectam tamen fere hæctenus, vel etiam à plerisque commentatoribus oppugnatam. Plures Dd. hanc Juris divini speciem agnoscentes citat Brucknerus *Decis. Matrimon. Dissertat. proæm. n. 26.* Cum verò nemo accuratam hujus Juris à Jure Naturæ differentiam tradere aggrederetur, tentavit Dn. Præf. in *Instit. Jurisprud. Div. L. I. Cap. 2. §. 119. seqq. & Cap. 4. §. 79.* has species perspicuè & evidenter à se secernere.

§. 85. Etsi verò B. Brucknerus in *d. Dissert. proæm. n. 38. seqq.* istam Juris divini speciem rejecerit, & aliquot rationes congesse-rit, quæ eam impugnare videantur, cur tamen non opus arbitramur, ut in responsionibus ad has objectiones nos detinea-mus, causæ datæ sunt in *Not. ad Instit. Jurisprud. Div. d. l. lit. c.* Et jam quidem his responsionibus adhuc minus est opus, postquam Jctus Lipsiensis Dn. Georg. Beyerus in *erudita Dissert. de Dispensatione circa matrimonium intra gradus consanguinitatis & affinitatis prohibitos §. 44.* nuperrimè id fecit.

§. 86. Et senserunt quidem jam ante motas istas de polyga-mia controversias aliquot eruditi, quod ex regulis justitiæ, sive ex communibus hypothefibus Juris Naturæ quæcunque etiam illæ sint, non omnes actus, qui in causis matrimonialibus cen-sentur Christianis esse interdicti, possint demonstrari. Quo-niam tamen tum temporis lex divina positiva universalis adhuc negligebatur, in defectu ejus ad pudorem confugerunt, quo-niam partim in communi locutione, partim etiam in LL. Justi-nia;

nianeis quædam conjunctiones dicuntur repugnare pudori naturali. Et disertè Paulus Jctus in l. 14. §. 2. ff. de R. N. ait, *in contrahendis matrimoniis naturale Jus & pudorem inspiciendum esse, contra pudorem autem esse, filiam suam uxorem ducere.* Unde haud dubiè communium errorum defensores occasionem sumere solent dissentientes gravium criminum & violati pudoris naturalis accusare. *Conf. supra §. 6.*

§. 87. Primus autem distinctam pudoris in causis matrimonialibus à Jure Naturæ naturam tradere aggressus est Lambertus Velthuyfius Medicus Belga vir inquirendæ veritati maximè deditus, sed in cognoscendis erroribus facilior quam in consequendo vero. Edidit is anno hujus seculi 51. *Dissertationem Epistolicam* tectò nomine *de principiis justitiae & decori, continentem Apologiam pro tractatu Hobbæi de cive.* Summa principiorum ejus eò redit. Quæcunque naturâ suâ ita sunt comparata, ut finem in creatione mundi à Deo intentum impediant, illa omnia jure naturali prohibita sunt. Sine quibus verò iste finis obtineri non possit, illa omnia jure naturali sunt imperata *d. dissert. p. 14.* Res mediæ inter hæc duo sunt moraliter indifferentes, *(p. 19.)* & juris positivi objectum. *(p. 27.)* Istum autem finem ut in lucem proferat, dicit: Illa à Deo intenta esse & hominem exequi velle, quæcunque ex creatione mundi & ordine in eo constituto homo judicet à se necessario agenda vel omittenda, nisi insignis aliqua disconformitas extitura sit inter suam actionem & illam, ad quam ordo mundi ipsum dirigat. Cum enim mundus in sapientiâ sit ordinatus, & homini partes agendi in hoc universo assignatæ, ordo ille necessario homini indicare debet, quodnam cujusq; in agendo sit officium *(per §. 28. seqv.)*

§. 88. Vides hac occasione jus mundi & ejus ordinem, jam ab hoc Autore pro fundamento juris naturalis venditari, cum hac tamen inter alias differentiâ ab hypothese superius excussa, quod Velthuyfius Jus Naturæ non statuat aliis creaturis infra hominem esse commune, sed soli homini proprium, ut patebit ex mox dicendis, in quo nobiscum sentit; tum verò quod Auctores, cum quibus superius egimus, fateantur plus una vice, hanc

hypothefin de ordine naturæ effe valdè obfcuram & inevidentem, in qvo laudem merentur, Velthuyfius verò, dum eam exponere hic vult, obfcurum exponat per æque obfcurum, finem mundi per ejus ordinem, quod haud dubiè non feciffet, nifi putaffet, ordinem naturæ effe rem valdè perfpicuam atqve omnibus patentem, in qvo tamen cum poftulet aliquid, quod omnes homines sentiunt aliter fe habere, non eft, ut nòs detineamus, aut diffiniciones, quibus iftum ordinem naturæ (cum de pedum ufu ufurpatione rhedæ interceptò, & mammillarum ufu à delicatis fœminis infantibus denegatò fibi ipfi objectio- nem format *p. 35. feqv.*) limitat & reftringit *p. 38. feq.* curatius examinemus.

„ §. 89. Dividit autem officia hominis in officia hominis in.
 „ Deum, de quibus agit *p. 30.* officia hominis in feipfum *p. 32. feq.*
 „ & officia erga proximum *p. 98. feq.* Officium hominis erga
 „ Deum, feu cultum naturalem ita ex creatione mundi deducit
 „ *p. 30.* quod homo inde agnofcat Dei fapientiam, potentiam,
 „ juftitiam. Se ipfum verò cum contemplatur homo, ante
 „ omnia in fe deprehendere fummum ftudium fe confervandi
 „ falvum & incolumem, cui ftudio inferviant appetitus edendi,
 „ bibendi, vindictæ, affectus amoris & doloris, deniqve omnes
 „ animi paffiones; item totius corporis fabrica, & organorum
 „ fubordinatio. *p. 33.* Atque ex hoc ftudio fe confervandi poftea
 „ omnia officia juris naturalis erga fe ipfum, tum & erga alios
 „ homines *p. 98. feqq.* deducit. Quapropter & hoc principium
 „ de confervatione fui fubinde primum principium juris naturæ ci-
 „ tat, ut adeò ordo naturæ & confervatio fui ipfius videantur æquè
 „ latè patere: quamvis valde obfcurum fit, quomodo ex conferva-
 „ tione fui officium hominis erga Deum deducatur. Quod du-
 „ bium & ipfe fortè fenfit, unde in ultimâ editione hujus differta-
 „ tionis, quæ eft *part 2. Operum p. 961. feqq.* iftam curam conser-
 „ vandi feipfum *p. 968.* officiis hominis erga Deum, quamvis fatis
 „ contortè immifcet, eamqve his verbis inter cognitionem de Dei
 „ fapientiâ & omnipotentiâ interponit: *At quandoquidem in me ex-
 „ perior tale ftudium me confervandi, ut illud nec à me fit ortum, & ta-
 „ men tam altè mihi fit infitum & inclufum ut ita dicam fanguine & me-
 „ dullis,*

dullis, ut illud nec ejici nec evelli à me possit, rectè inde concludo, illum instinctum à Deo esse, & rectè facere, si illi paream.

§. 90. Patet igitur, eandem esse hypothesein autoris cum hypothesei Hobbesii, quam & apertè in dictâ dissertatione defendit vel potius emollit. Cùm enim Hobbesius istam fundamentalem legem ex jure omnium in omnia & statu belli universalis deducat, Velthuysius eam ex consideratione sapientiæ divinæ & ordine ac fine hominis derivat. Quare etsi Hobbesiana ista fundamenta jam diu à Pufendorfio, Cumberlandio, aliisque viris eruditis prostrata sint, non tamen firmiter prostrata esse censeripotuerunt, si non fulcrum hoc, quod desperatæ causæ Hobbesianæ suffulcit Velthuysius, destruitur.

§. 91. At quid multâ curâ hic opus? Ipse autor fulcro utitur ad fulciendum minimè apto, cum ratio, qua curam illam se conservandi probare vult, nihil evincat. Nam in primâ editione p. 33. nihil amplius affert, quàm quod cura conservandi nos nobis insit. Inest verò etiam hominibus cupiditas voluptatum, divitiarum, honoris, h. e. libido, avaritia, ambitio. An ergo & hæc erunt fundamentum Juris Naturæ? Quæ fortè sentiens Velthuysius *in operibus d. l.* addit limitationem: illa videlicet à Deo esse, quæ nec à me sint orta, & tamen altè mihi insita & inclusa sanguine & medullis, ut illa nec ejicere nec evellere possim. Nos tamen nihil mutamus. Et propositionem etiam sic formatam negamus. Nam & sub eadem subsumere possumus omnia tria vitia, quæ tamen à Deo non sunt. Non proveniunt ea à nobis, i. e. non acquiruntur post nativitatem ex libertate voluntatis nostræ, sed à prima origine nobis insunt. Hærent in sanguine & medullis, nec evelli à nobis possunt, quod firmiter probavit Dn. Præses in der Ausübung der Sitten-Lehre Cap. ult.

§. 92. Et præterea cum homo ipso Velthuyfio fatente, pluribus cupiditatibus & affectibus sit præditus, bonis & malis, quos inter cum plures boni esse poterunt, videri debebat ante omnia, quoniam effectus sit inter reliquos præcipuus. Unde falsa est etiam ex hoc capite illatio. Indidit Deus homini curam se conservandi, quod sanè fatemur, (etsi id non probetur per rationes

Velt.

Velthuyfii) E. hæc cura est fundamentum juris naturæ. Indidit etiam Deus homini amorem aliorum hominum seu socialitatem, cui cum potius inserviat cura se conservandi, quàm curæ huic amor, ut latius probavit Dn. Præses in *Instit. Jurispr. div. L. I. C. 4. §. 76. & II. C. 2. & in der Einleitung zur Sitten-Lehre C. 8.* inde socialitas potius fundamentum juris naturalis est, quàm cura sui ipsius.

§. 93. Sed ut ad pudorem pergamus, distingvit Velthuyfius peccata contra officium hominis erga seipsum induas classes, ut alia dicantur peccata *contra naturam strictè loquendo*, alia *contra decorem hominis naturalem*, quia cum hominis dignitate non congruant (*p. 41.*) Priora dicuntur, in quibus est deviatio ab illo fine, ad quem propriè ille appetitus (nos conservandi) nos ducit: quorsum refert appetitum voluptatis libidinosæ, quem non magis dubitat homini à naturâ inditum esse quàm affectum amoris, iræ, audaciæ &c. Sic tamen ut homo non debeat mutare objectum & finem isti affectui à Deo ordinatum, quod objectum in hoc affectu sit compar & adjutrix mulier & finis liberorum procreatio. (*p. 42. 45.*) In senibus tamen illam copulam damnari non posse, non magis quàm cupiditatem vindictæ in homine infirmo, qui noverit suas vires impares esse ad propulsandum malum, justè tamen eum irasci, quia acceperit injuriam. Ita & senem appetere posse copulam, quia objectum adest ejus appetitus scil. mulier, licet sciat se finem non posse assequi. (*p. 41. 46.*)

§. 94. Hic nescimus, an non his fluctuationibus Velthuyfius totam suam hypothesin destruat. Dixit ex *ordine & fine* rerum derivandum jus naturæ. Dixit: affectus libidinosi finem esse procreationem sobolis. Dixit, senem non posse obtinere finem, & tamen dicit, senem non peccare contra jus naturæ, quia adsit objectum affectus. Unde facile quis & scortationi possit patrocinium sumere, quia & scortator sequestrato fine objectum hujus affectus deperit.

§. 95. Non tamen hoc admittere vult Velthuyfius, & negat voluptatem ipsam libidinosam finem esse posse ipsius appe-

appetitus, cum nulla voluptas, quæ affectus comitetur, possit esse finis eorundem aut objectum, quamvis voluptas possit in rebus & actionibus, quas nos ultro facimus, quando lubet, rationem primarii objecti & finis obtinere, ut in ambulatione voluptatis gratiâ institutâ. Unde ad hæc peccata, quibus homo in se ipsum peccat i. e. contra naturam strictè loquendo, pertinere scortationem strictè dictam, in qua nec rationem generandæ proles aut ejusdem educationem habeamus. (p. 47. 49.) Sed hoc pacto dubium non tollitur. Esto voluptatem non posse esse finem libidinis, sufficit, quod concesserat, senibus etiam citra intentionem finis satisfacere cupidini, modo adsit objectum debitum, quod etiam pro se allegabit scortator.

§. 96. Pergit Velthuyfius d. p. 49. Si quæ alia consuetudo viro cum muliere intercedat, quæ propter conditiones quas ineunt, talia naturalia indecora post se non trahat, & tamen vulgò scortatio vocetur propter defectum quarundam conditionum, quæ in matrimonio strictè dicto adsint, eam non esse illegitimam ex ratione naturali e. g. polygamiam, divortium extra casum adulterii, item (p. 50.) incestuosa matrimonia, pudendorum revelationem, quia hæc omnia non repugnent appetitui veneræ libidinis, & quia Deus in iis dispensaverit, (p. 51.) Sed hæc tamen repugnare pudori & honestati naturali (p. 60. 63.)

§. 97. Ergo statuit hic Velthuyfius, ea, quæ contra pudorem & honestatem naturalem sunt, non esse contra jus naturæ, adeoque in causis potissimum matrimonialibus præter legem naturæ i. e. præter conservationem sui ipsius agnoscit alium fontem honestatis & turpitudinis, pudorem & impudentiam. Cum hac tamen assertionem non bene connectunt, cum alibi dicit. (p. 72.) Peccata quæ contra honestatem naturalem fieri dicuntur, mala esse, quia fiant contra primam & fundamentalem legem, conservationem scil. sui ipsius: neminem enim fugere, quanti referat ad bene esse, ut quivis contemptum à se moliatur. At qui impudicè se gerit, contemptum suorum effugere non posse. Hic enim expresse Velthuyfius peccata contra pudorem dicit, repu-

gnare conservationi sui ipsius. Nisi dicere velis, distinguendum esse ex ejus mente inter ea, quæ directò conservationi repugnant eamque destruunt, & quæ saltem eandem diminuunt, ut non, tam benè sit. Peccata §. 96. recensita non destruere essentiam hominis, sed saltem famam diminuere

„ §. 98. Denique *p. 89.* exponit Velthuyfius secundam clas-
 „ sem peccatorum, quibus homo in se ipsum peccat, quæ supra
 „ §. 93. dixerat committi contra decorem naturalem hominis
 „ seu hominis dignitatem: quæ quidem hic non describit, sed eò
 „ saltem refert ebrietatem & gestus ac inflexiones membro-
 „ rum indecoras.

§. 99. Hic verò nova obscuritas oritur: quomodo scil. vitia contra decorem & dignitatem hominis differant à vitiis contra pudorem. Sanè ob indecora pudore debemus suffundi: & non nisi gradualis videtur esse differentia inter impudentiam ejus qui pudenda revelat, & qui aliis gestibus indecoris utitur. Videamus, an & hujus obscuritatis sublationem ab autore expiscari possimus. In *probatione questionum quarundam ex Scriptura Sacra* (quæ Dissertationi de principiis justitiae & decori subjuncta est *p. 113. seqq.* non verò extat in operibus junctim editis) *p. 238. seqq.* istam distinctionem trium specierum peccatorum, quæ homo in se
 „ ipsum committat, repetit, atque dicit: peccata contra deco-
 „ rem naturalem cum iis quæ propriè contra naturam fieri dicantur, sub una classe redacta esse, (intelligimus, factas esse, species unius generis) quia in iis omnibus *impudentia* fit. De peccatis verò aliis (scil. quæ committi dixerat contra pudorem) asseruisse, quod horum omnium nihil quicquam in se turpe sit, sed fiat saltem propter circumstantias. Ita pudendorum revelationem in multis casibus posse non turpem esse, & nullos gradus naturæ lege prohiberi in matrimonio, & nulla colloquia de rebus venereis esse impudica. Sed fieri talia propter circumstantias vel à libidine proximi vel ab *ejus dignitate*, vel ab *estimatione propria*, in qua unusquisque se tueri debeat.

§. 100. Sed hæc quidem expositio rem facit obscuriorem, cum in peccatis contra naturam etiam, item contra dignitatem homi-

hominis dicat esse impudentiam: E. & hæc, adeoque omnia tria vitiorum horum genera erunt contra pudorem. Et tamen ea quoque, quæ contra pudorem in specie esse dicuntur, talia sunt propter dignitatem seu æstimationem proximi. Et ergo peccata contra pudorem, & contra dignitatem rursus erunt eadem.

§. 101. Quod si evolvatur dissertatio hæc de principiis justitiae & decori, quatenus extat *Tom. II. operum p. 961. seqq.* confusior redditur Lector de mente Autoris. Ibi enim *p. 970.* peccatorum primam speciem, quæ supra §. 93. dixerat committi contra naturam strictè dictam, nunc dicit committi contra *decorem naturalem* hominis, eamque speciem opponit alteri, quæ committitur contra *dignitatem*, cum tamen supra §. 93. *decorem naturalem* & *dignitatem* in alterâ specie synonymicè usurpaverat. Ibidem porro *p. 972.* scortationem supra §. 95. ad primam peccatorum classem relatam refert ad secundam, quibus homo contra suam dignitatem peccet. Imò ibidem etiam divortium & polygamiam supra §. 96. etiam ad peccata contra pudorem relata inde rursus eximit, & in iis non tam contra *pudorem*, quam contra *dignitatem* naturalem peccati dicit, & adeò inter peccata contra pudorem ibi solum refert incestum & revelationem turpitudinis. *Conf. p. 981.*

§. 102. Uti igitur ex his satis constat, autorem fluctuasse, ipsum in secernendis peccatis contra pudorem & dignitatem hominis, imò uti dicta ostendunt, quod in causis matrimonialibus præter legem naturalem agnoscat adhuc duo alia fundamenta distincta *pudorem* & *dignitatem* hominis; ita nos quidem de his fundamentis nihil judicare possumus, quamdiu ignoramus, in quò axiomate illa fundentur, & quomodo à se secernantur. Videmus equidem *p. 981.* quod peccata contra *dignitatem* sint, quæ repugnent etiam dignitati hominis integri, contra *pudorem* verò, quæ profluant ex lapsu. Ante lapsum enim, dicit, hominem in ea gloria & dignitate fuisse, ut functiones animales, sui corporis ei non potuissent conciliare contemptum, quia supereminens dignitas ipsi versans ante mentis oculos pepulerit, ita à functionibus animalibus illarum vilitatem, ut ejus se pude-

dere non haberet necesse, & quia ita singuli homines integri judicaverint de istis functionibus animalibus, ideò nullum pudori fuisse locum. Sed tamen nondum videmus, quomodo hic pudor strictè dictus, & alter pudor, quando committitur, quid contra dignitatem hominis, conveniant, & in quo axioma practicò uterque pudor diversus fundetur, quâque ratione axioma istud ex dictamine rectæ rationis & naturæ hominis deductum à lege naturæ, quæ etiam in naturâ hominis fundatur, differat.

§. 103. Ergo quæramus mentem Autoris in locò, ubi ex professo, quod dicitur, de pudore tractat. Edidit enim præterea tractatum moralem de naturali pudore & dignitate hominis, in quo agitur de Incestu, Scortatione, Votò Calibatus, Conjugiò, Adulteriò, Polygamiâ & Divortiis &c. Ex quò tractatu præ cæteris fundamenta Autoris examinanda erunt, cum hic specialiter ac fusius de usu doctrinæ de pudore & dignitate hominis in causis matrimonialibus agatur. Ac videtur etiam hic tractatus post dissertationem de principiis justitiae & decori esse conscriptus, etsi hæc in Tomo II. operum, ille autem in Tomo I. p. 165. seqq. extet.

§. 104. Hòc locò igitur p. 166. docet, tres esse causas pudendi.

- „ 1. Quando quid committitur, quod suâ naturâ peccatum est,
- „ contra leges justitiæ & charitatis.
- „ 2. Quando committitur ali-
- „ quid in specie contra pudorem & non contra leges justitiæ &
- „ charitatis, quando nimirum certis de causis debemus parcere
- „ pudori nostro & proximi, ut in incestu & pudendorum revela-
- „ tione.
- „ 3. Quando peccamus contra nostram dignitatem, ut
- „ in scortatione, polygamiâ vel repudiis. Et hanc causam qui-
- „ dem arctè cum priori connexam esse, distinctionem tamen,
- „ hic quoque observatam usum præbituram in progressu tracta-
- „ tus, (i.e. in definitionibus causarum matrimonialium.) Pri-
- „ mam causam pudendi huc non pertinere, sed reliquas duas esse
- „ excutiendas.

§. 105. Hic equidem illud discimus: Pudorem sumi vel latè, vel strictè, vel strictissime. Latè ut etiam sub se comprehendat, cum quid sit contra leges naturales, strictè ut ea saltem

tem denotet, quæ his factis opponuntur, fiunt tamen contra decorum vel dignitatem hominis; strictissimè quando opponuntur etiam factis contra dignitatem hominis. Ergo debebat hic autor tradere fundamenta mediæ acceptionis, & distinctionem specierum duarum exinde profluentium. Idque eò magis utile erit, cum etiam detur rusticus pudor de re bonâ vel honestâ, & quæ nullum vitium aut argumentum infirmitatis continet. Nisi ergo certa axiomata ponantur, perpetuò confundentur pudor rusticus seu irrationalis & pudor genuinus ac virtuosus.

§. 106. Sensit id ipse Autor, unde p. 167. instituit ea sub „ examen vocare, in quibus pudor & pudicitia propriè occupata „ sint, cum propter existentiam pudoris rustici à simplici pudor- „ ris affectu argumenta peti non possint, utrum pudor sit legiti- „ mus an culpandus, sed debeant ad rationis trutinam appendi. „ Brevitatis tamen studio præmittit quædam postulata. Quare „ & nos brevitatis studio singulis postulatis iudicium nostrum „ aut censuram subjiciemus.

§. 107. *Postulatum* 1. Homo mas & fœmina à DEO princi- „ pio creatus, *integer* quidem & à peccati labe purus fuit, sed qui „ habuerit tamen ex doctrina Pauli 1. Cor. XV. *corpus animale* (non „ spirituale,) quod non fuerit aptum fruendæ voluptati gloriæ „ cœlestis.

§. 108. Hoc postulatum fortè nemo negabit, cum conveniat, quæ nos vidimus, commentariis in dictum Pauli locum. Nobis tamen negare licebit, si ostenderimus paucis, id postulatam repugnare principiis interpretationis Logicæ & Physicæ genuinæ. Res non cognoscetur melius, quam si exhibeatur paucissimis periphrasis sententiæ Paulinæ & intentio.

§. 109. Omne corpus, ut alibi ostensum est specialiter, spiritu præditum est, cujus spiritus vi etiam in prima creatione jussu Dei terra & aqua proferebat aves & reptilia & quadrupedia. Productum post productionem appellatur in Ebraicis *nephesch chajâb*, anima vivens, Græcè *ψυχή ζῶσα* Gen. I. v. 20. 21. 24. Homo vero in statu integro tanquam creatura nobilissima & vicarius DEI in his terris debebat haud dubiè esse præditus corpore nobilissi-

mô & spiritu diversô à spiritibus creaturarum reliquarum. Igitur etiam DEUS non iussit corpus istud produci à terra per spiritum terrenum, sed ipse narratur id formâsse, i. e. omnibus organis corpori huic convenientibus ornâsse. Et consequenter, istud corpus statim post formationem vitâ & animâ quâdam præditum fuit, partim cum nullum corpus Spiritu destitutum sit, partim quod nullum corpus organicum possit concipi tanquam mortuum. Semper enim in homine mortuô organum aliquod læsum est, etsi imperfectio intellectus nostri non semper possit ostendere, quod nam sit læsum.

§. 110. Ergo statuo, hoc corpus cum & cerebrum & linguam habuerit, statim præditum etiam fuisse potentiâ cogitandi & loquendi, uti infantes nostri hodierni præditi sunt. Sed cum in illo statu hominis essentia in hac cogitandi & loquendi facultate non debebat subsistere (cum verosimiliter serpens in statu integritatis etiam has facultates, & consequenter etiam similem hodiernæ structuræ corporis humani structuram possederit, *Gen. 3. v. 1.*) sed potius amore DEI imbui, atque ope hujus spiritus ab amore creaturarum, quorsum naturâ suâ inclinat spiritus terrenus, *ψυχή*, abstrahi, inde DEUS dicitur in faciem ejus inflâsse halitum vitæ, & sic etiam hominem factum esse *nephesch chajâb*, i. e. essentiam viventem, sui tamen generis reliquas omnes eminentem *Gen. II. v. 7.*

§. 111. Cum verò omnis Philosophia Gentilis destituta fuerit principiis veræ & Mosaicæ Physicæ, atque spiritum illum universi vel planè negaverit, vel ineptè circumscripserit, atque prætereâ & essentiam humanam in cerebrô ejus posuerit non in corde, & denique hominem definiverit, quod sit animal rationale, atque hâc Philosophiâ Gentili (adhuc hodiè ubivis regnante) imbuti fuerint etiam septuaginta interpretes; non potuerunt quoque significationem differentem & *nephesch chajâb*, quatenus de homine & de reliquis animalibus prædicatur, percipere, sed in versione *versic. 7. Gen. II. Cap.* istas voces æquè reddiderant, *ψυχή ζῶσα anima vivens*, seu *animal*, uti reddiderunt de bestiis.

§. 112. Hanc verò versionem in eo loco 1. Cor. XV. satis apertè taxat Paulus, & justâ atque veræ doctrinæ physicæ de naturâ corporum conveniente periphrasi locum Geneseos explicat. Respicere Paulum 1. Cor. XV. v. 45. cum quo tamen & jungendus v. 47. ad dictum locum Genes. II. v. 7. in confesso est, & conceditur ab omnibus. Periphrasin autem esse & interpretationem non versionem, cuilibet patebit à præjudicio vacuo utrumque locum inspicienti. Dicit Moyses: *Et formavit DEUS hominem terram ex terra.* Explicat Paulus: *Factus est prior homo Adam è terra terrenus (v. 47.) sed jam tamen animal vivens (ψυχὴ ζῶσα) v. 45.* Pergit Moyses: *Et flavit DEUS in nares ejus spiraculum vitarum, & sic factus est homo nāphesch chajāb.* Explicat Paulus: *Posterior autem & secundus homo, qui erat Dominus ex cælo, factus est spiritus vivificus, i. e. corpore spiritali gaviscus est.* Atque adeò docet, reddendum esse istud nāphesch chajāb spiritum vivificum, non animal vivens. Præprimis cum satis inconveniens sit, ex spiraculō vitarum cœlestis essentiæ & divinæ virtutis nil aliud prodiisse, quàm animal aliquod terrestre.

§. 113. Hæc jam quidem sufficiant de vera expositione loci Paulini. Communis expositio per primum Adamum intelligens hominem in statu integro, per secundum Adamum Christum, hōc firmissimō, ut videtur, argumentō impugnari potest: Si Adam integer habuit corpus animale, non spirituale seu spiritum vivificantem, fuit etiam illud corpus animale corruptioni obnoxium, ignominiosum & infirmum & morbidum per expressos versic. 41. 42. 43. 44. At hoc quis tam audax erit, ut de corpore Adami integri sibi imaginetur?

§. 114. Adde: Si Adamus integer habuit corpus animale, non spirituale, sequitur, quod nos hic gestemus imaginem hominis integri non lapsi per versic. 49. Sed nos gerere imaginem hominis lapsi, non integri, uti in confessō est, ita disertè dicitur Genes. V. v. 3.

§. 150. Imò, si Adami corpus in statu integro fuit terrenum, non spirituale, fuisset ejus corpus ignobilius omnibus corporibus cœlestibus per versic. 40. seqq. At homo in statu integritatis
non

non fuit ignobilior creatura sole & stellis, quia sol & stellæ non sunt à DEO tali cura formatae, nec ad divinam imaginem conditæ.

§. 116. Adde: Si nostram expositionem seqvaris, non debes anxius esse, ubi ultima verba *in vers. 45. (posterior autem factus est spiritus vivificus)* in Genesi extent. At si seqvaris communem, dic nobis, ubi extant illa verba, quæ ibi Paulus *ἡ δὲ ψαλμὸς?* Quære per totum Codicem, inquit Lightfootus *in Horis Hebr. ad hunc Pauli locum.*

§. 117. Denique evolve Lexica Ebraica: Invenies, *nephesh* non habere certum & unicum significatum, sed varia denotare, imò radicem ejus ignorari, quò argumentò etsi non demonstratur assertio nostra, adjuvatur tamen & illustratur.

§. 118. Est hæc quæstio, quam huc usque tractavimus, non Theologica, i. e. Dominis Theologis propria, sed evidenter Logica & Physica, neque ad hunc locum contorta, sed eâ vel maximè opus fuit, ut justè negatò Velthuyssii Postulato primò possumus eò fortius destruere sequentia, inter quæ *Postulatum II.* est „ *d. p. 167.* Ergo in corpore Adami aliquid vile fuisse, & quod „ minus honestum erat in eo sensu, quò Paulus quædam membra corporis minus honesta appellat. *1. Cor. XII. 2. 3.*

§. 119. Negamus hoc postulatum: Probationem ejusdem jam infirmavimus, quomodo verò infirmare velint communem sententiam postulati primi foventes, ipsi viderint. Urgemus ulterius: Si aliquid vile fuit in corpore Adami, fuit & probrosum. Sed tale, quid non fuit per ea, quæ ex ipso autore excerpsumus. §. 102.

§. 120. Vult hanc objectionem effugere Velthuyssius, negando identitatem membrorum vilium & probroforum *d. p. 167.* & concedendo, quod Adamus de nullo membro in illo statu debuerit erubescere: addendo insuper, quod illa vilitas corporis animalis fuerit ita absorpta à justitia originali, ut illud vile & humile planè dispareret. Sed regerimus: identitatem membrorum vilium & probroforum non posse negari, quia eandem definitionem habent, & eam identitatem insuper agnoscit

Scit Paulus 1. Cor. XV. v. 43. & 44. Si verò vilitas fuit absorpta, ut disparuerit, non habuit Adamus amplius aliquid vile in corpore suo, & sic destruitur ipsum postulatum.

§. 121. Provocat eqvidem Velthuyfius in hoc postulado ad Paulum 1. Cor. XII. v. 23. Sed iterum frustrâ, quia Paulus ibi apertè loquitur de vilitate conjunctâ cum ignominiâ & de statu membrorum post lapsum, unde malè ex illo loco quid infert Velthuyfius ad statum corporis humani ante lapsum.

§. 122. Probamus assertum, ne prolixi simus, brevi circumscriptione textûs Paulini. *Quæ putamus membra in hoc statu præsentè maximè esse inhonestâ, ut quæ propterea etiam pudendorum nomen acceperunt, iis obtegendò ea sollicitè honorem ampliore circumponimus, & ita, quæ sunt in nobis indecora, tegumentis illis copiosiore decorem habent. Nam quæ sunt in nobis decora, ut facies, manus, pedes &c. iis non est opus, ut ea tegamus. (Sed si tegimus, fit ex mollitie, ut quando nos tegimus pedes,) Inde cora verò sunt omninò tegenda, quia iste honor obvelationis non est ab arbitrio hominis, sed DEUS ipse in judicio post lapsum habitò simul ita temperavit corpus, & vestimenta ordinavit, ei parti pudendæ, cui deerat tegumentum, hòc modò copiosiore tributò honore &c.* Respicit enim Paulus haud dubiè ad Genes. III. v. 21. Ne putes, DEUM etiam in statu integro hominem creâsse cum membris indecoris, uti videtur perperam intellexisse Velthuyfius.

§. 123. Unde ex dictis jam maximè dubium redditur *Postulatum III.* Velthuyfii p. 168. Vides illas res & actiones corporis animalis, quanquam non pares gradu, esse appetitum edendi, bibendi, coeundi & organa istis functionibus destinata. Hic ante omnia notandum, Velthuyfium vi hujus postulati non solum membra hominis, quæ hodiè pudenda sunt, pro vilibus habere, sed & ipsum os hominis ut quod organum est, quo homo utitur ad edendum & bibendum.

§. 124. Secundò notandum, Velthuyfium, dum dicit vilia membra differre gradu, adeoque etiam curam circa istos gradu aliquo differre debere, neque tamen hic explicet illam graduum differentiam, explicandum esse exiis, quæ habet p. 172. Coitum

„ inter omnes actiones corporis animalis & terrestres esse abje-
 „ ctissimum, ideo non solum remotis arbitris debere fieri, sed
 „ & partes istum actum juvantes esse obtegendas. Proximas his,
 „ quamvis longo intervallo esse, quæ inserviant excernendis ex-
 „ crementis, ideo in illis omnibus hominum curam versari, ut
 „ quàm maximè fieri possit, clam & secreti licentiam nacti istis
 „ abjectis actionibus defungantur. Deniq; edendi & bibendi
 „ actiones (in quib; adeò constituetur gradus tertius) aliquo de-
 „ coro cohonestandas esse, ne gulæ studiosi aut ventri dediti vi-
 „ deamur. Esse enim contra decorum & *dignitatem* hominis, fun-
 „ ctionibus, quas corporis animalis natura requirat, & ex quibus
 „ nullæ sint ingenuæ oblectationes, sese jactare aut ostenta-
 „ re, sed potius ingemiscendum esse, quod, donec simus in his
 „ corporis compagibus, iis muneribus perfungi debeamus.

§. 125. Igitur graduum illorum trium differentia secun-
 dum Velthuysium in eo consistet, quod membra primi gradus
 non solum sint clam usurpanda, sed & obtegenda, adde etiam ex
 „ *p. 168.* absque præfatione honoris ne nominanda quidem, sed
 „ in iis aut eorum actionibus recensendis ambitu verborum,
 „ utendum aut talibus vocibus, quæ quam minimè insinuent
 „ menti vilitatem eorum; membrorum autem secundi gradus
 „ actiones saltem clam & sine teste edi debeant: tertii gradus
 „ membrorum actiones honestis & decoris moribus honestandæ
 „ sint, nec in iis gloriandum, aut ea votis expetenda, cum con-
 „ trà votis expetere liceat acre ingenium, firmam memoriam,
 „ robur & agilitatem corporis, sermonem venustum, incessum
 „ gravem & compositum *d. p. 168.*

§. 126. Simul verò constat, partes generationi destinatas
 pertinere simul ad primum & secundum genus, os verò simul ad
 genus secundum & tertium, quia ore etiam ejicimus excremen-
 ta; nasum etiam ad secundum genus pertinere; ventrem ad
 tertium: mamillas foeminarum ad neutrum, quia nec iis inest
 turpitudine coitus, nec excrementa iis ejiciuntur, nec ad cibum &
 potum pertinent, sed ad sustentationem proles destinatae sunt.

§. 127. Committit autem aperte in hoc postulato petitionem principii Velthuyfius: Dixit supra §. 106. Affectum pudoris sua sponte non dijudicari, utrum legitimus an culpandus sit, sed ad rationis trutinam esse adpendendum. Hic verò per nullam rationem monstrat diversitatem graduum, sed saltem ex moribus, & ex eo quod fieri solet circa diversa membra, postulat ea docere quæ fieri debeant, quod inconcinnum est. Quid si ergo cum tali homine ipsi res foret, qui Cynicas hypotheses secutus assereret, istos diversos secundum triplicem turpitudinis gradum pudoris effectus pertinere ad pudorem rusticum & illegitimum? Quid si κατ' ἀνθρώπων urgeret, non apparere, cur coitus inter omnes actus corporis sit vilissimus, (præprimis cum Velthuyf. veram turpitudinis causam hic non ponat in conscientia libidinis, ut mox videbimus,) cum tamen sit ordinatus ad generationem humanam, & adeo sit generi humano utilissimus? Quid si pergeret, membra huic actui destinata in structura sua nihil vilitatis habere præ cæteris membris, sed potius omnium sapientissimè & admirabiliter structa esse, ut in anatomicis considerationibus à Dominis Medicis ostendi solet?

§. 128. Imò, cum Velthuyfius ex sola membrorum genitalium turpitudine velit eadem esse & obtegenda, & cum præfatione honoris nominanda, & clam actum conjugalem usurpandum, non ob libidinis æstrum, & verò per dicta in eorum structura nulla sit turpitudine, necesse ei foret, ut causam clandestinæ usurpationis & velamenti & circumscriptionis eorundem in sermone quærat in eo solo, quod excrementa per eadem ejiciantur. At verò nec hanc esse causam genuinam, inde patet, quia aliàs sequeretur, totam faciem hominis tegi debere, & nasum atque os cum præfatione honoris esse nominanda, quia & per nasum & per os excrementa ejiciuntur, & quidem tantò magis, quantò majorem horrorem ac nauseam solet communiter excitare id, quod ex ore, potissimum hæticorum ejici solet præ excrementis vesicæ aut alvi. Quorum tamen utrumque repugnat moribus omnium, quas scimus gentium, & ipsius Velt-

huyfii doctrinæ, qui oris vilitatem saltem in tertio & infimo turpitudinis gradu collocat, cujus effectus secundum ipsum ad obtegenda membra ejus generis, aut cautionem, ne simpliciter nominentur, non porrigitur. Quid quod ipse ne quidem membra secundi generis ob solam excrementorum ejectionem velit tegi, sed saltem usum eorundem remotiis aliis hominibus velit fieri, cum tamen ea quæ per os ejiciuntur, communiter soleant & in præsentia aliorum hominum excerni. Ut taceam, quod ex ejus hypothefi mamillæ mulierum non sint velandæ, quod tamen etiam moribus moratiorum gentium est adversum. Conf. quæ ipse habet Velthuyfius p. 172.

§. 129. Denique etfi concedamus, circa membra tertii generis, moderatè esse utendum cibo & potu, nec jactandum esse, eorum usum aut delectationem eorundem expetendam esse, negamus tamen eam observationem derivandam esse ex pudore, qui legi naturæ contradistingvitur, sed potius, quia alias homo incurrit vitia intemperantiæ. At intemperantia est vitium juri naturæ repugnans. Neque indistinctè eidem concedimus quod liceat exoptare acre ingenium, firmam memoriam, robur & agilitatem corporis, sermonem venustum, incessum gravem & compositum. (*vid. supra* §. 124.) Nam sapiens sua sorte est contentus, si hisce rebus destituatur, neque easdem appetit sed sumit. Qui enim talia enixè appetunt, aut in iis se jactant, declarant se maximè ambitione laborare: at vitia ambitionis æquè dictamini rectæ rationis repugnant, quam vitia voluptatis. Quod verò communiter homines soleant erubescere ob vitia voluptatis, non autem ob vitia ambitionis, ratio est, quod voluptas fit vitium ambitioni maximè oppositum, & quod ambitio in hominibus, ut qui omnes naturâ veris virtutibus destituuntur, mentiatur virtutes, earumque characterem ac nomen assumat.

§. 130. Denique & istud parum cohæret, quod Velthuyfius in deducendis tribus pudoris gradibus immisceat dignitatem hominis (*vid. §. 123.*) cum tamen superius §. 104. dixerit, quod velit inquirere fontes pudoris strictè dicti, quatenus à dignitate hominis distingvitur.

§. 131. Progredimur ad *IV. Postulatum*. Dicit *p. 168*. De „ vilibus hisce functionibus corporis terrestris Adamum in statu „ integritatis non erubuisse, quia Deus & omnes creaturæ illi tùm „ fuissent amicæ. Unde nec eum tùm fecisse selectum inter bo- „ num & malum, adeoque rectè de primis parentibus, cum ad- „ huc essent illibati à peccato, prædicari, eos bonum & malum „ nescivisse, cum hujusmodi bonum non cognoscatur nisi per „ suum oppositum &c.

§. 132. Hic equidem cum Velthuyfio non disputabimus, an ejus sententia vera sit, quod in Adamo fuerit ignorantia vitiorum, præprimis cum in sequentibus verbis satis commodè se explicet, quod per hanc ignorantiam non intelligat stupiditatem, in intellectu, sed carentiam desiderii in corde. Nobis sufficit, quod & hoc postulatum, quatenus immiscet, Adamum in statu integritatis habuisse corpus terrenum, & exinde deducitur, jam profligatum sit in postulato I. §. 107. seq.

§. 133. Unde etiam nihil speciatim notabimus ad *Postulatum V. p. 169*. Post peccatum Adami oculos mentis fuisse reclusos, & illicò sensisse aliam legem oppositam legi mentis suæ, & ita suo damno scientiam boni & mali acquisivisse. Nisi quod idem hic repetendum sit, deductionem saltem hujus assertionis esse falsam, quatenus cum postulato primo connectitur.

§. 134. In *Postulato VI.* causam exponit Velthuyfius „ *d. p. 169*. cur Adamus per peccatum gloriâ Dei & excellenti- „ bus donis privatus erubuerit in sua nuditate, quia videlicet „ illa organorum generationi deditorum abjecta natura non „ amplius tecta fuerit, & obumbrata gloria justitiæ originalis, se „ statim ita prodiderit, ut merito pudore suffunderetur, intelli- „ gens se meritò pati in animis hominum aestimationis suæ imminutionem, & judicans, *Evam* rationis potentem & aptam ad judican- „ dum de turpitudine sua.

§. 135. Hic uti repetenda sunt ea, quæ modo contra doctrinam de abjecta natura membrorum genitalium monuimus §. 126. seq. item quæ superius de obumbratione vilitatis per justitiam originalem dicta sunt §. 120. ita non intelligimus, quid cogi-

taverit Autor, cum dixit, Adamum intellexisse, se in animis *hominum* æstimationis imminutionem pati. An enim alios homines intelligit præter Evam? Certè tamen non intelligit PræAdamitas quosdam, sed fortè posteros Adami. Interim nullam causam pudoris habuisset Adamus pudendi propter Evam, neq; propter Posteros, quæcunque demum causa & origo pudoris sit. Non propter Evam, quia inter eos, qui communi turpitudine aut causa pudendi laborant, semper pudor cessat. Non propter Posteros, partim propter eandem rationem, partim quod posteri Adamum non viderant in statu pristinae felicitatis. Nam coram his pudere solemus, qui nos viderunt in felicitate quam amissimus, coram aliis non ita. Et revera Protoplasti pudore suffundebantur post peccatum non inter se, utpote cum & præter modò dictam rationem summa familiaritas tollat regulariter pudorem, sed intuitu Dei. Vel id etiam indicare saltem vult scriptura: quod unà cum lapsu pudor ortum duxerit, ante lapsum non exiturus.

§. 136. Occasione autem hujus postulati Velthuyfius causam exponit, cur à communi sententia recedat, causam pudoris ob partes genitales ponente in libidine per revelationem eorundem excitandâ. Etsi enim procul dubiò ob hanc causam curam tegendæ nuditatis augeri concedat, proximam tamen & veram pudoris causam esse non arbitratur *p. 170.* quod simul est ejus *Postulatum VII.* quia non possit probari, proprietates actionis veneræ (quæ libido dicuntur) non adfuturas fuisse in statu integritatis, quia videantur seqvi naturam istius corporis terrestris & animalis.

§. 137. Hic eqvidem viderint defensores communis doctrinae, quod Adamus integer habuerit corpus animale & terrenum, quomodo objectioni huic Velthuyfii satisfaciant. Quod enim communiter afferri solet, hominem etiam integrum eodem modo se miscuisse foeminæ ut hodiè, non tamen voluptate illâ libidinosa in actu ita fuisse abreptum, non satisfacere potest, quotiescunque quis cogitat, illum libidinis sensum ex ipsa seminis resolutione oriri, atque homini etiam invito ex ipsa actionis natura obtin-

obtingere. Nos quidem facile hanc objectionem Velthuyfii evitamus, qui suprà negavimus, Adamum integrum habuisse corpus animale & terrestre.

§. 138. Dicta hætenus satis ostendunt, parum solidi quid de pudore à Velthuyfio expectandum esse, unde & quæ jam ex istis Postulatis infert, robore suo destituuntur. Etsi enim facile concedamus Velthuyfio, Pudorem post lapsum in Adamo non, fuisse pudorem rusticum & intempestivum, item falli eos, qui, docent, hominem tantum erubescere debere in peccatis; (d. p. 170.) ac denique: (p. 171.) necessitatem pudenda tegendi, ab Adamo in omnem posteritatem fuisse transmissam, non, tamen Velthuyfius differentiam genuinam ostendit secernendi pudorem rusticum à justo pudore, non rationes justas dedit refutandi dogma Cynicum, non causam genuinam, cur pudenda tegenda sint, exposuit.

§. 139. Nolumus exgo, quæ sequuntur, ulterius ex illò autore excerpere, cum ipse p. 157. ubi ad rem perventum est, satis dilucidè confiteatur, quod nihil, in quo fundare te possis, ab ipso sit expectandum. Sed, ait, ut semel rem totam de principiis innati pudoris expediam, statuimus, omnium cultiorum morum semina, à quibus moratiores gentes commendantur, quæque honestatis, modestiæ, decoris nomine veniunt, in ipso homine reperiri: neque illa tam arte, industriâ & ratiocinatione longè petitâ primùm germinare incipere, quàm quidem exemplis ad aliquam frugem excrecere. Hic sanè Velthuyfius sensit, se imparem esse proposito cum p. 167. dixerat: pudorem & verecundiam, quamvis à natura ortum habere videantur, ad rationis trutinam esse adpendendas, & affectum pudoris non suâ sponte (& exemplis) judicari, utrum legitimus an culpandus sit. Quam in rem etiam postea Postulata hætenus expensa proposuerat.

§. 140. Cum igitur hisce principiis fluctuantibus à Velthuyfio tota doctrina de incestu, scortatione, votò cœlibatus, conjugio, polygamiâ, adulteriò, item divoritiis & repudiis, sit superstructa, constat, nec iis quem securè posse in definiendis causis matrimonialibus inniti. Unde discant simul, qui ad veti hæte-
nus

nus fuerunt, doctrinas in causis matrimonialibus communibus erroribus contradicentes traducere, tanquam impias & pudori naturali adversas, neque tolerandas in Republ. Christianâ, ne in posterum talia tentent, antequam ipsi satis distinctè docuerint originem & fundamenta pudoris naturalis.

§. 141. Equidem quod Paulum Ictum attinet, cum is Gentilis fuerit, & institutionem primævam conjugii atque Leges Divinas positivas universales ignoraverit, facile habemus excusatum, quod in deducenda turpitudine incestûs genuini fontis ignarus in pudore aliquo naturali refugium quæstiverit. At quod Jure-Consulti Christiani sequestratò fonte genuinò sacrarum literarum & lege divinâ positivâ malint ignorantiam Pauli sequi, id quidem miramur. Nam in causis matrimonialibus pudorem omnem ex legibus vel naturalibus vel positivis derivandum esse, non verò contra moralitatem actûs alicujus in his causis à pudore deduci debere legibus contradistinctò firmiter statuimus.

§. 142. Quemadmodum autem hætenus liberè ostendimus, quid in aliis displiceat, ita ut eò melius constet, absque affectu nos & solò veritatis inqvirendæ studio egisse, ostendemus ultimò, quid in genuinis fundamentis etiam desideremus. Scilicet deduxit equidem Dn. Præses in *Instit. Jurisprud. Div.* decisionem plerarumq; quæstionum matrimonialium, partim ex lege naturæ *Lib. III. Cap. 2.* partim ex lege positivâ universali *Lib. III. Cap. 3.* Cum tamen & hic nonnulla immixta fuerint ex communiter receptâ doctrinâ, quæ ex posterioribus cogitationibus emendationem desiderarunt, in titulò Disputationis nostræ, dum fundamentorum hætenus receptorum insufficientiam indicavimus, etiam huc respeximus. Quare nec mirandum, quod in dictis *Instit. Lib. III. C. 3. §. 58. seqq.* quæstio difficilis de divortiorum causis non fuerit soluta, sed suspensa.

§. 143. Dicimus *insufficientiam* fundamenti non falsitatem. Id enim firmum esse statuimus, (1) quod in quæstionibus causarum matrimonialium, quando de potestate Principum circa matrimonia propria vel subditorum quæritur, non unum, sed duo, nec plura tamen fundamenta sint: Jus scilicet Naturæ, & Jus
Divi-

Divinum positivum universale. (2.) Quod origo utriusque juris ac differentia, & fundamentales propositiones in Instit: Juris divini perspicuè ac convenienter sint ostensæ. (3.) Quod ex his fontibus in Cap. 2. & 3. Lib. III. dictarum Institut. multæ eæque difficillimæ quæstiones jam satis feliciter sint resolutæ, & modi respondendi sententiis adversis perspicuè ostensi.

§. 144. Insufficiencia verò, quam hic innuimus, partim respicit Jus Naturæ, partim Legem positivam universalem. Quod Jus Naturæ attinet, quoniam id in convenientia cum natura hominis consistit, non solum ad percipiendam ritè doctrinam juris naturæ sufficit, nosse socialitarem seu naturam communem hominum in relatione extra se, sed & opus est, probè vitare communes errores de natura hominis speciali & interna. Hic verò Dn. Præses in dict. Jurispr. Div. supposuit adhuc communem & capitalem errorem Philosophiæ Gentilis, quod hominis essentia consistat in intellectu animæ, & quod intellectus emendet voluntatem. Hunc errorem verò sequuntur alii, quod homo sit species infima ac unica, ac quod homines habeant eandem essentiam specificam; item quod voluntas hominis habeat liberum arbitrium intuitu quorumcunque actuum, saltem externorum, & quod hoc liberum arbitrium in omnibus hominibus, quoad naturam suam consideratis sit æquale: item quod in dijudicanda licentia actionum specialium humanarum, in genere eam definire liceat, ita ut quod uni homini liceat, liceat & alteri &c.

§. 145. Quod si enim contra ostendas, *hominis essentiam non consistere primario in Intellectu, sed in Voluntate, & Intellectum corrumpi semper aut emendari à Voluntate*, suâ sponte etiam reliqua omnia adversò modò erunt docenda, scilicet: Hominem non esse speciem infimam, sed *homines quotquot existunt, specie inter se differre*; item, *voluntatem hominis sæpè cogi vi amicâ*, ita ut resistere non sit in hominis arbitrio; item: *quod uni homini facile est agere aut vitare, id alteri esse difficile & sæpè etiam impossibile*; item: quod circa actiones illicitas equeidem communia possint axiomata tradi ab omnibus hominibus observanda: quoad *licentiam verò actionum* talia axiomata tutò non tradantur, sed hic rem dijudican-

dicandam esse partim ex *intentione agentis*, partim ex *decoro*, & facilius quemvis interrogantem: an hoc vel illud sibi liceat agere? sibi ipsi respondere, *quam responsionem dari posse à tertio*, quod est contra communem sententiam eorum, qui casus conscientiae scribunt.

§. 146. Hæ verò observationes, uti se diffundunt per omnes casus conscientiae, ita etiam in causis matrimonialibus sæpius earum usus se exeret. Præprimis cum de *ritibus nuptialibus* sermo est. v.g. an liceat in nuptiis Christianorum *musicâ, choreis, convivis* &c. uti? item: an liceat ducere *fœminam, nobilem, divitem, pulchram, juvenem?* &c. item: an liceat inire matrimonium *ad morganaticam*, aut quod Galli vocare solent: *Mariage de conscience?* item: an liceat *vovere cœlibatum?* an liceat *contumbere cum uxore gravidâ?* & quæ possunt esse quæstiones similes. Et in genere cum quis consulit J Ctum, an salvâ conscientia hoc vel illud in matrimonio facere possit? Quod si enim ad J Ctorum officium pertinet cautelas præscribere circa contractus aut stillicidia, multò magis ad eos pertinet cavere, ne quid in societate hæc agatur contra leges DEI.

§. 147. Quod autem Legem Divinam positivam universalem attinet, docuit Dn. Præses *in Instit. Jurispr. Div. Lib. I. Cap. 2. §. 125.* plures esse species legis hujus, & eas vel dirigere officium hominis circa cultum DEI, vel circa alios homines, illas immediate intendere beatitudinem æternam, has verò immediate temporalem. Docuit porro *Lib. III. C. 3. §. 2. & 3.* DEUM etiam in statu integritatis legibus naturalibus leges matrimoniales positivas adjecisse, quasdam autem in statu post lapsum esse adjectas, neque tamen rationes harum legum positivarum in statu integritatis publicatarum inquiri posse, cum DEUS easdem non revelaverit. Docuit denique *Lib. III. Cap. 7. §. 129. seqq.* ex lege positiva universali homicidium, incestum, concubitum cum menstruata, adulterium, immolationem seminis Molocho factam, Sodomiam esse punienda capitaliter.

§. 148. Cæterum re exactius pensitatâ in illis sententiis multa jam desiderat Dn. Præses aliter ponenda, quæ tum ob præjudicium

dicium communium errorum ubique regnantium non viderat. Nam (1.) differentia illa legum positivarum falsò supponit, *felicitem temporalem & eternam specie differre, cum saltem differant gradu*: unde potius distingvendum hic esset inter tranquillitatem hominis aut pacem *internam & externam*. (2.) Falsò supponitur, quod *in statu integritatis diversum fuit Jus Naturæ à Positivo*. Cum enim in statu integritatis homo naturâ fuerit in statu *gratiæ*, & verò post lapsum Lumen naturæ fundamentum præbeat Legis Naturalis, lumen gratiæ legis positivæ, patet, hominem in statu integritatis naturâ suâ intellexisse voluntatem omnem DEI, nec peculiari revelatione habuisse opus. (3.) Falsò supponitur, quod *præter leges conjugii aliæ sint leges positivæ universales societatem humanam & officia hominum inter se respicientes*. (4.) Falsum enim est, *ullas leges pœnales in Scriptura Sacra pertinere ad Leges positivas universales, sed omnes ibi recensitæ spectant ad leges forenses*. Non obstat Gen. IX. v. 6. Levit. XVIII. v. 29. (5.) Falsum est, *quod in ulla lege positiva universali DEUS respiciat ad pacem hominis & salutem externam, sed potius pertinent ad salutem internam*. Nam 6. *omnes leges positivæ universales matrimonium respicientes spirituales & internum ac mysticum finem habent* Ephes. V. vers. 29. 32. (7.) Quâ ratione tùm temporis non accuratè pensitatâ, non mirandum, quod in dictis Instit. Lib. III. Cap. 3. §. 71. quæstio de divortio indefinita fuerit relicta. (8.) Cum leges hæ divinæ matrimoniales habeant finem saltem spirituales, *debent etiam saltem spiritualiter judicari*, i. e. non requirunt eæ pœnas temporales, sed relinquendæ sunt vindictæ divinæ spirituali.


§. 149. Etsi verò hæ hypothesès suum frequentissimum & ferè continuum usum habeant in controversiis de potestate Principis circa matrimonia, & Dn. Præses tam quoad has, quàm eas, quas §. 145. indicavimus, summam dicendorum jam in dictatis MSC. partim annò proximè elapsò in Collegio ad Inst. Jurisprūd. Div. partim annò 1694. in peculiari meditatione de Fundamentis, unde causæ matrimoniales dirimendæ sunt, indicaverit, quoniam tamen in præsentī Dissertatione saltem de Fundamentorum hæctenus jactorum insufficientiâ agere decrevimus, istorum quidem omnium

omnium deductionem relinquimus peculiari Disquisitioni de
fundamentis genuinis Causarum matrimonialium.

§. 150. Antequam verò & hoc fiet, exanimanda adhuc erunt
aliorum Doctorum fundamenta definiendi controversias matri-
moniales. Quorum alii ad *mores Gentium moratiorum* recurrunt,
alii ad *Leges Mosaicas forenses* provocant, alii ad *mores primorum*
Christianorum, vel quinque seculares, vel etiam ad puriora tem-
pora, antequam scilicet Ecclesia virginitatem suam amitteret,
& sub Constantinô M. ope Anti-Christi mater fieret; alii allega-
tione *Juris Romani* scripta exornant; alii contra prima principia
Jurisprudentiæ Protestantium Ecclesiasticæ sibi persvadent, quod
in causis matrimonialibus sequamur *Jus Canonicum*; alii deni-
que *farragine Autorum omnis generis*, Patrum, Scholasticorum,
Jctorum, Pontificiorum, Lutheranorum, Reformatorum in-
turmas dispositâ, adversarios suos si non refutare, saltem ter-
rere sustinent. Vides adeò, quàm latus se hic differendi aperiat
campus. Sed & ista requirunt peculiarem discursum de
fundamentis spuris causarum matrimo-
nialium.

S. D. G.

QUÆSTIONES.

1.  Um matrimonium certò respectu, sit res spiritualis, & spiri-
tualia spiritualiter sint judicanda, ex hoc respectu verò pro-
fluat prohibitio divortiorum & polygamie, queritur: An hæ
prohibitiones possint confirmari per sanctionem pœnarum temporalium?
2. Matrimonia ob voluptatem, avaritiam & ambitionem inita non
sunt spiritualia. Unde queritur: An in questione de divortiis possint
considerari ut spiritualia, h. e. an huc possit applicari dictum: Quos Deus
conjunxit, homo ne separet?

